


SHALOM

 Disangisha, disangisha dyànyi dyà cidimu cipyacìpyà mutùcidi ànu tubangilakù cyanààna. Aka ki kàànyi kampanyè kàà kumpàlampala menemene kàà kacya cidimu cipyacìpyà cyàtwadija. Kaa, mvwa mwenze ndambu wa malòlò kumbelu, pashìishe kupweka ku Fort Huachuca aku. Ki munùtù bafwànyine kucìshindumuna nàнку mpindyewu anyi? Ncyèna mmòna munùdi nufùnda *Huachuca* nubanga ne dileeta dyà *H* to. [Katùpa kàà mukàbà wà mèyi munda mutupù—Muf.]

² Katùtu, katwàkwikala ne cilumbu cyà lumwènù lwà cìmonànyimà to. Lumwènù lwà cìmonànyimà lùtu ànu lutangila paanyimà ne lumòna mwaba úvwà awu. Twètù tudi tutangila kumpàla bwà kumòna kutùyààya, nwamònu's. Aci ncìdi mu matùkù à kale, Pòlò wàkamba ne: “Mpwà mwoyi bintu bìdi bimane kupita abi, Ndi ngambulujà mutangile ku kiipacilà kàà dibiikila ditumbuke mu Kilistò.” Nènku ki citùdi baswe kwenza ncyòci aci. Muntu, tudi mwà kwela mèsù paanyimà kùkaadi bidimu dikumi ne bitaanu, anyi dikumi ne bisambòmbò, pàngàakalwà mu Phoenix musangu wà kumpàla, kudi bintu byàbùngì byenzeke kubangila ànu piine apu, bìmpè ne bibì, byònsò bìyaya ku Cilumbulwidi, mu byanza byà Nzambì. Kàdi cìndi ndumbila mpindyewu ncìngùikala mwà kwenza mu cidimu cilwàlwà eci, bwà kutancisha Bukalenge, kwenza bitambidile, byònsò bìndi mwà kwenza bwà Bukalenge bwà Nzambì abi.

³ Mpindyewu, mu mapingaja emu ndi muswe kutwala Diyishà dyà cidimu cipyacìpyà edi kùdi Èkèleeziyà udi mu Kilistò, ne pashìishe màalabà dilòlò netùbangè kusambidila babèedi. Nènku netwàbanyè twarta twà disambila pankacì pàà...Ngeela meeji ne disangisha didi dibanga pa dìbà mwandamutekète, dìbà mwandamutekète ne tusunsa makumi àsàtù, mbìmpè kwikala mwab'ewu pa dìbà isambòmbò anyi dìbà isambòmbò ne tusunsa dikumi ne tùtaanu, dìbà adi, bwà kupeta twarta twènù twà disambila, apu kanwàkutacisha citupa cikwabo cyà disangisha nànsha.

⁴ Tudi baswè kusàkidila mu—mutangidi wa kaaba aka, wa Ramada ewu, bwà mudiye mutwanyishile bwà kupeta citanda eci bwà masangisha aa, kumpàla kwà mpungilu ewu. Mukalenge amubènèshè.

⁵ Nènku mpindyewu panwìkalà baswè kubuulula mu Mifùndu, mwaba wutùdi baswè kubala, Némبالè mu Yeshàayi, nshapita wa 60, ku mvnsà mwi—mwi2, wa 1 ne mwi2. Ne Misambu 62:1-8. Misambu 62:1-8, dyàmbedi.

Bulelèlà musùukà wànyi mmwindile Nzambì: kùdiye nkudi kufumina lwànyi lupandu.

Ànu yêyè ki lubwebwe lwànyì ne lupandù lwànyì; yêyè ngudi ngabu wanyì; ncyàkunyungishiibwaku bikole to.

Too ne cikondo kaayi cinwàtùngùnukà ne kungelela meeji à macimbu? nwênù bônso nenushipiibwè: nenwikàle bu cimanu cyàmba kuupuka, bu lupangu lwàmba kubumbuka.

Mbaye ku citungu ànu bwà kutonkola panshì, bwà kumutonkola pa mwaba wèndè mutumbuke awu: bàdi basankila mu mashimi: bàdi babèleshila ku mishiku, kàdi mu mwoyi beela milawu. Diikisha.

Musuùkà wànyì, wêwè eyèmèna ànu Nzambì; bwalu dyànyì ditekemena dìdi difumina kùdiye.

Ànu yêyè ke lubwebwe lwànyì ne lwànyì lupàndu: yêyè ngudi ngabu wanyì; mémè ncyakunyungishiibwaku to.

Mu Nzambì ki mùdì lupàndu lwànyì ne butumbi bwànyì: lubwebwe lwà dikàndà dyànyì, . . . cisokomenu cyànyì, cidi mu Nzambì.

Mweyemenaayi dībà dyônso; nwênù cisàmbà, pòngololàayi myoyi yènù kumpàla kwèndè: Nzambì ùdi bwètù cisokomenu. Dikiisha.

⁶ Ndi munange mùshindù udi Davidì ùcyàmba ne: “lubwebwe.” Nudi numòna’s, misangu búngiyì ne: “Nzambì ùdi lubwebwe lwànyì.” Nudi bamanyè cidi lubwebwe luumvwija, mu Bible anyi? *Lubwebwe lùdi “dibuulula.”*

⁷ Mwàkambà Peetèlo ne: “Wêwè udi Kilistò, Mwànà wa Nzambì udi ne mwoyi.”

⁸ Yêyè ne: “Udi mubènèshiibwè, Simona, mwànà wa Yona. Ne pa lubwebwe elu, dibuulula edi. . .” Nzambì wàkamubuulwilacì. “Ki mmusunya ne mashi bìdì bikubuulwile eci to, kàdi Taatù Wanyì udi mu Dyulu. Pa lubwebwe elu, dibuulula edi, Nèngiibakilèpu Èkèleeziyà Wanyì.”

⁹ Ne Davidì nyêyè ewu wela lubila ne: “Nzambì ùdi lubwebwe lwànyì, dibuulula dyànyì!”

¹⁰ Mpindyewu mu nshapità wa 60 wa Yeshààyì, ku mvensa wa 1 ne mwi2.

Juuka panshì, kenka; bwalu bukênkè bwebe mbulwe, ne butumbi bwà MUKALENGE mbubùshiibwe pambidi pèbè.

Bwalu, mona, . . . mîdimà neyibwikile buloba, ne mîdimà yà mupimbu neyibwikile cisàmbà, kàdi MUKALENGE neájwukile pa wêwè, ne butumbi bwèndè nebùmwènekelè pambidi pèbè.

¹¹ Tusambilààyì. Mukalenge Yesù, patùdì twelangana meeji pa Mèyi aa apa, nyewu tudibwinka mpindyewu bwà kubanga

disangisha edi, bwà bunèèmè Bwèbè. Tùbènèshèku, Taatù, tudi tulomba mu Dìna dyà Yesù. Amen.

¹² Mpindyewu, cyena-bwalu cyànyì mu mapingaja emu cìdi mwaku umwèpelè: *Shàlom*. Mu cyena Ebèlu, mbwena kwamba ne “ditalala.” Ditalala, anyi mmwoyi wa dyelangana, mmùmwa ne “ditalala diikale nèènu,” anyi, “difika dilenga,” “bèt wabu,” ndyelangana mwoyi dyà—dyà mùshindù kanà ònsò. Kàdi mwaku wa mushinga wùndì musangane mu cyena Ebèlu emu, kùdi bintu bùngì cyanààna bìdiwu wumvwija, kàdi byònsò abi biikale byàmba ànu cintu cìmwècìmwè aci ne: “ditalala.”

¹³ Bu mutùdi tukungamangana ne cidimu cipyacìpyà eci, tudi tukungamangana ne byònsò bibìdi, bu mungààbadi, midimà ne Bukènkè. Mpindyewu tudi tumòna ne Davìdi, mu dyakula dyèndè apa, mmwambe ne: “Eyemena Mukalenge. Tèeka dyeyemena dyèbè mu Yèyè.” Yeshàayi mmwambe ne: “Mìdimà ya mupimbu yìdi yìlwa pa cisàmbà eci; kàdi bwà Èkèleeziyà ajuuke ne akenkè, mu butùmbi bwà Bukènkè.”

¹⁴ Pa nàнку tudi tukungamangana ne cidimu eci ànu mutùtu twenza bidimu byònsò ebi; kudi ka—kanyinganyinga bwà bilema byètù byà mu matùkù mashààle, ne dindila dyà matùkù àcilwalwà a Bukènkè bwà butùmbi bwà Kilistò. Kakuyi mpatà to, twètù biikale ne mwoyi cidimu eci cijimà, netùpete bilema byàbùngì bitùdi benze, nènkù tudi ànu ne cyàkutekemena aci bwalu bìdi byenda ànu pamwè ne cìmpè ne cibì. Aci’s ki mukenji wà macinka utùdi twenda naawu mu nsòmbelu wetù wa panu ewu. Kàdi tudi ne disànka dyàbùngì dyà kwikala ne Mutwàngaji Udi musòmbè ku dyàbalùmè dyà Nzambi, bwà kwàkwilangana. Patùdi baswe kwitaba bilema byètù byà ne tùdi benze bibì, dìbà adi Yèyè ùdi ubifwa luse. Yèyè mmùle tente ne ngàsà ne luse, bwà kutùfwila luse ku bilema abi.

¹⁵ Mìdimà ya mupimbu eyi, ndi njinga kwakulapu dyàmbedi ne, yìdiku bùngì cyanààna pa buloba leelù wa ndaayà ewu, yènda yìfiika ànu kufiika dìbà dyònsò. Ku cidimu ne ku cidimu, tudi tusangana nàнку, ne bu—buloba bùdi butamba kufiika, mu ngaakwilu wa nyumà, bwalu bàkaadi benda bàbààbacila mu mìdimà. Mpèkaatù wàtambi kuvula. Nyewu tucìlila mu citwàfumu ku dipicila eci, dishebeya dyà Mfùmù wa ditùnga, ne bikwàbo, ne bantu biikale bashipiibwa ne cikisu mu ditùnga dyètù mene emu. Mwaba mwine, utùvwà katuyiku bafwanyine kwela meeji ne aci ncifwanyine kwenzeka mu cikondo cyà dishidimuka dyà cyena leelù edi to, kàdi ncyà bushùwà ne ncyenzeke, bwalu mìdimà yà mupimbu yìdi pa bantu. Mpindyewu, aba biikalà kabàyi baswe kulwa ku Bukènkè, dìbà adi kudi cintu ànu cìmwèpelè cìndi mwà kwamba bwà cidimu cìcilwalwà eci, nenùtambe kutùkina mu mìdimà pàdi cidimu cyenda ciya apu.

¹⁶ Kàdi bwa aba biikalà mwà kutangila, mu cidimu

cipyacipyà eci, ku Bukênkè abu, dîbà adi nenùtambe kukenka kukenkelamu, too ne ku Ditùkù dipwangane ditùdì bindile adi, dimweneka Dyèndè, kwikalà mîdimà yònsò mwa kujimina—kujiminyinamu. Nènku bwà bwalu abu, ki bûndì ngambidila, Èkèleeziyà wa Nzambi udi ne mwoyi, leelù ewu ne: “Shalom,” bwalu twètù tudi Makênkè Èndè. Yesù wàkamba ne: “Nudi Bukênkè bwà bàà pa buloba.”

¹⁷ Mpindyewu, muprofeta mmwambe ne: “Mîdimà yà mupimbu pa cisàmbà eci; pa bantu bàà pa buloba, mîdimà yà mupimbu.”

¹⁸ Nukaadiku bamòne, mu bidimu bikesè bishààle ebi, bamwè bàà kunùdì nwènù balùme ne bakàjì bàà bukole bwànyì ebu aba, mùshindù ùdì cidimu cyònsò, bimweka bu ne mîdimà yìdì yènda yivula bikole anyi? Mvwa ngààkula ditùkù adi, ki mèmè kwambila mukàjàànyì ne: “Udi mumanye’s, bìdì bimwèka ànu bu ne, pàdì bidimu byenda bipita, nènku mbyenze ànu bu ne bantu mbabange kwenda kuya ànu kule menemene ne cintu cilelèlè cìvwà cikèngela bwà kutambabu kuseemena pabwipi naaci menemene.”

¹⁹ Ngăcimònu, munkaci mwà bantu. Tangilààyì pambelu mu mìsèèsù, ne nangananga munkaci mwà bakàjì, tangilààyì majinga abo ne bidibo baswè kwenza, ne bàdì—bàdì munkaci mwà kushintulula bilwinji dîbà dyònsò. Balùme bakaadi benda bàtàmba kulwa bu bakàjì, ne bakàjì benda bàtàmba kulwa bu balùme, ne biikale bimwèka ànu bu ne kakwena mùshindù wà kuciimanyika to. Ndi mutwe eku ne eku kwà ditùnga, nyiisha mpiisha cintu aci, kàdì ngààlukila cidimu cidi cilonda anyi bitàmba kubiipa kutambidila ne pangàkabanga apu. Cidi, bantu abu mbaswe kwenza maalu mîmpè, kadi, bôbò, kùdì cintu kampànda pa bwalu abu cidi kaciyi mwà kubalekela benza maalu mu mùshindù mujaalame to. Cidi ànu cibàcìncimike, cibenzeja ku bukole. Ncyenze—ncyenze bu diciima dyà bujitu difike, dibwikidije buloba bujimà. Kì ng’ànù mu Phoenix nkààyaamù to, kàdì pa buloba bujimà, mbimwèke ànu bu ne kùdì mîdimà midyungwije munkaci mwà kудisanga, yenda yitamba kudyunda, dîbà dyònsò, munkaci mwà kupuusa kuumusha buntu bulùme bwà bushùwà, ne buntu bukàjì bwà bushùwà. Ndi ngààkula bwà mu byà mubidi.

²⁰ Nènku, bôbò, mbimwèke ànu bu ne. . . bìdì byenda bitàmba kubwela mu maèkèleeziyà. Nènku pashìishe paùdì ujuuka ne wamba cintu kampànda cyà cìcilwìsha, dîbà adi bàdì bakupiisha ne bwalu wàcìlwìshì. Nwamònu’s, udi—udi mwà kucimòna cilwa, ne—ne pashìishe paùdì wakula bwa kucìlwìsha, muntu kampànda ùdì ucyumvwa bibi. Míngà misangu bakàjì bacyumvwa bibi, balùme bacyumvwa bibi, bangata cilunji cibi.

²¹ Muntu misangu mikwabo, muntu mwîmpè, bikèngela itabe bintu byà mùshindù awu bwà kushààla mulame milongo yèndè

ya butèndeledi yà mudiye amu, bwalu, yêyè kàyi mwenze nàнку to, ùdi wipaciibwa, nènku díbà adi ùdi—ùdi ùdishàádila nkàâyende. Nènku díbà adi pàdiye ànu mwipaciibwe mu bantu kampànda, apu mbikole bwà kudiswika ne muntu mukwàbo, bwalu ukaavwaku mumanye ne wêwè udi wa mu musumbà mukwàbo ewu, díbà adi ki ne: “Cìdi cyenzeke lwà *eku* ncinyi?” Díbà adi udi mwenzejiibwe bwà kushaala mutwè makàsà panshì mu byùdi mwitabùùje, anyi kutungunuka ne webè njila, cyanàànà udi uvila byùdi mwitabùùje abi. Pa nàнку bìdi bicivwija citambe kukola bwà bantu.

²² Nènku bìdi bimwèka ànu ne cikondo cìdi, kwena mwà kumònà ngimanyinu mulelèlà awu to, wa muvwabi bikèngela bwà muntu kwikalaye. Ndi . . . Nànsha mene mu dicyàngata, kuumukila mu nyumà, mpindyewu kuya mu mubidi, Mémè . . . Bwànyi mémè bìdi bimwèka bu ne pàdi muntu mulùme ùwala bisàbaatà byà velour wa diikala dyà rose, ne bintu byà mishindù yònsò byà nàнку awu, mbyenze ànu bu ne mbàtàmbe kulwa bu bakàji. Ne bakàji banwa mfwanka, mpindyewu bàkaadi ne bifwanka, ne biikale ànu . . . ne bàkosa nsuki yàbò bu balùme; ne bimwèke ànu bu ne dye—dyengeleka, bu-inàbànzà, cintu cyà bukàji aci kacicyenaku to. Ne bulùme bwà bushùwà kabùcyenaku to; bimwèka bu ne kwònsò kùdiye wela meeji kùdi ànu ncintu kampànda cyà cibì, luseke lukwàbo alu.

²³ Ngeela meeji ne bìdi ànu bu muvwabi ku cibangidilu: “meeji ònsò mu mwoyi wa muntu àkatungunuka ànu ne kuvwijiibwa mabi.” Ndongamu yètù—yètù, ya ku televiziyo ne—ne ku tudyòmba, kabeenà bàbikenkete to. Muntu udi mwà kwamba cintu cyònsò, pamwè ne cyònsò, cìdiye muswè kwamba aci, bipendu bya ku bilàmbà mene ne kwamba minèkù yà bukooya, yà manyaanu yivwà—yivwà mene kayiyi yikèngela kwikala nàнку to, kayiyi nànsha, kayiyi yikèngela kwikala myambiibwe nànsha mu bar to. Kàdi bàdi mwà kucyàmba ku televiziyo ne ku tudyòmbà, kàdi kucituma buludì mu nzùbu yà bantu. Mbimwèke ànu bu ne midimà ya mupimbu mmibwikidije cintu cyònsò mu kaabujimà. Buloba bujimà bùdi ànu bu ne bukaadi bukooyike.

²⁴ Mpindyewu, bidimu ne bidimu, ndi muteetà bwà kukwata dibendele, Dìyi dyà Nzambi. Ne ndi mutambe kupangadika bwà cidimu cilwàlwà eci bwà kukwata dibendele adi kutamba muntùku kacya mukwate mu nsòmbelu wanyi, nwamònu’s, kwimana ànu buludi ne Dìyi adi. Mpindyewu, ndi ntekemena ne muntu kanà yònsò udi ubweja mu meeji èndè ne ndi ngenza nàнку bwà budimù, díbà adi, mwanèètù wa balùme, mwanèètù wa bakàji, s’ncyà bushùwà ne wêwè udi mu ntupakanyi. Ndi ngenza aci bwalu ndi muswikiibwe ku Cyòci aci. Mémè, ndi ne cyà kushààla ne Dìyi adi. Cyònsò cìdiDi dyàmba aci, nciyi nsakidila dyumvwija dyà muntu dyà pàà nkàâyende to, kuCyàmba ànu mùshindù awu. Mpindyewu kudi bamwe

bàdi bafwanyine kwikala bakumbane mwà kuDyumvwija ne kudifikisha ku dyumvwikaDi bishiilangane ndambu, kàdi mèmè ncyèna mwà kwenza aci to. Mwakulu ùmwèpelè ûndi mèmè mumanye ncidi cifùnda Mwab'ewu, ànu mùshindù ùdi Eci ewu amu.

²⁵ Mpindyewu, kukaadi ndambu wa bidimu, bidimu bitwe ku bisàtù, bikaadi pa kukumbana, pàvwà, kumbelu, ku èkéleeziyà wanyì, Nyumà Mwímpè mwakùla naanyi, wàmba ne: “Nda ku Tucson, kùdi cintu kampànda cidi cindile.” Mèmè kwimana pa cibumba cyà ku cyambilu apa ne kwambila muntu ne muntu wa kunùdi ne: “EMU MMÛDÌ MUKALENGE WÀMBA, cintu kampànda cidi pabwipi ne kwenzeka.” Pàmwàpa kùdi nkama ya bantu basòmbe kaaba aka bàdi bacimanye. Mvwa munwàmbile ànu cìmvwà mumòne. Mukenji udi pa mukàbà wa mèyi ne, *Tudi Dìbà Kaayi, Mukalenge?* Mèmè kumòna cisumbù cyà Banjèlo, cyenze bu—bu cipaapu cyà musàkà, cipweka ànu ku nord wa Tucson kwaka; lwà mu nùнку ewu, ku nord wa Tucson. Ki Bòbò kwakula naanyi cintu kampànda, kàdi ncivwa mumanye ne civwa ncinyi to. Nènku dîngà ditùkù kùdi... Kùdi bantu basòmbe kaaba aka patùdi twakula apa mene, bàbidi bàà kudibo, bàvwà naanyi, kwinaàaku pàvwà bwalu abu bwenzeke.

²⁶ Ki kuCikwatabo fòtò mu dyulu. Kupatukaci mu—mu cikàndàkàndà. Mvwa ngeela meeji ne mvwa ne cibejibeji aci. Eyowa ndi naaci. Ki cyòci aci. Nudi nucimona mwaba ewu mu cikàndàkàndà cyà *Life*, mu eci cibejibeji, ànu menemene muvwa Nyumà Mwímpè mwambe ne necyenzeke.

²⁷ Nènku ke Banjèlo mwandamutekète abu biimane ànu munùdi bammòne mwimane apa emu, e kungambila bwà kupingana kwànyì kumbelu, ne, maalu masokoka avwà balongolodi munda mwà bikondo bapangile mwà kulenga awu, maalu masokoka a Bible, avwa Bitampì Mwandamutekete bilame awu, avwà ne cyà kubuuludiibwa. Ndi ngeela ní nganyi ní nganyi kadyòmbo, bwà angate *Bitampì Mwandamutekète* abi abikenkete, ní wàsànganamu kalèma. Nwamònu anyi? Nwamònu anyi? Bwalu mbifidiibwe ku disonsodiibwa dyà Nzambi.

²⁸ Kumpàla kwà cyòci aci, mvwa muyiishe pa *Bikondo Mwandamutekète Byà Èkéleeziyà*, ne pashiishe mubizòla ku cibàsa mu tabernacle wanyì.

²⁹ Dilongesha dyànyì, ncitu nyiisha Dilongesha dyà nshindameenu pambelu to, ànu bishimikidi binène byà butangadiki; bwalu ndi munkaci mwà bàna bèètù, mbafwànyine kupangakanangana naanyi, ne ncyena nteeka Cyòci aci kumpàla kwà bantu bàdi apa aba to. Ndi nteeta ànu bwà kushààla mu bishimikidi byà menemene byà Mifùndù, bu bitùdi twitabuuja ebi. Kàdi, ku tabernacle wanyii, bàdi baCikwàta pa mukàbà wà mèyi. Wèwè muCiswe, udi mwà kuCipeta. Pìkala mpaasàta

webè kàyi muswe bwà wèwè kuCìpeta to, kuCyàngaci to. Nwamònu's, aci ncikutangile ànu wèwè.

³⁰ Kàdi mwòmò amu, pâmvwà nyiisha pa *Bikondo Mwandamutekete byà Èkèleeziyà*, ne bwà kwikala ne dyanyisha dyà kudi Nzambì; kubizola, mu mùshindù wàkabwela mîdima mu èkèleeziyà, ku Nicée; ne banjèlo bàà èkèleeziyà, baamisànjeela abu. Cívwa ne cyà kwikala mu cyòci, bwalu, ndi mwenze ànu nyizola too ne ku cikondo cyà ndekeelu cyà èkèleeziyà, mu dindà dyà dyàlumingu, pa dîbà dikumi ne umwe jaajaaja, Bukènkè bunène abu kupwekabu mu nzùbu amu, kumpàla kwà bantu bungi bu bwà bàdi basòmbe apa aba; kupwekabù ne kukenkeshaBu ku cibadi cyà cimanu, ku mèsù kwà bantu bònsò abu, ne kuzolaye Bikondo byà Èkèleeziyà abi ànu menemene mûmwà mubizòlaku amu. Mpindyewu, kùdi nkamà ne nkamà yà bantèmù muntwamu bwà kujaadika cyòci aci. Ànu . . .

³¹ Èè, mpindyewu, tudi bamanye ne Nzambì ùtu misangu yònsò ànu uleeja bintu mu dyulu kumpàla kwà kubileejaYè pa buloba. Muvwa beena meeji balonda mutootò, ne bikwàbo amu. Cimanyinu cyà mu dyulu cidi cyyenzeka, dyàmbedi, pashiishe cyà pa buloba cidi cishindikà cimanyinu cyà mu dyulu. Nzambì ùtu ukwata mudimu, wenza maalù mu bimanyinu, bimanyinu ne maalù àà kukèma. Bìdi ne cya kulonda beena kwitabuuja myaba yònsò. Beena Yuda bavwa misangu yònsò ànu bakeba cimanyinu, bwalu bavwa basungula bàà Nzambì, nènku bàvwa bakeba cimanyinu. “Tulèèje cimanyinu, apu kaayi netwitabuuje.” Nènku, dîbà adi, pààkalwà beena meeji ne bwalu bwàbo abu, Beena meeji abu, ku dilediibwa dya Kilistò, ànu ku cidimu cipyacìpà aku.

³² Mpindyewu tudi tusangana ne ngondo, mu Bible, ùdi ùleeja èkèleeziyà. Ùdi ùleeja bukènkè pa buloba, pàdi dîbà kadiyipù to. Bwakabuulwibwà, nshapìta wa 12, ùdi bulelèlè ùcyùmvwija: “mukàjì mwikàle ne ngondo mwînshì mwà makàsà èndè, dîbà ku mutù kwèndè.” Ne mudibi ne pàdi dîbà kadiyipù to, pàdi dîbà diye ku luseke lukwabò lwàlwa, ngondo ùdi ùleeja nsèsè yà dîbà pa buloba. Èkèleeziyà ùdi ne cya kuleeja Yesù Kilistò kùdi bàà pa buloba, pàdi Mwànà wa Nzambì kàyipù to. Tudi bònsò twitabuuja aci. Ncintu cyà pabwàci, bu mudibi bitambe kushìlangana.

³³ Kàdi pâmvwà ngaakula kaaba aka, mu cidimu cyà 1933, bwà paapà ùùmuka mwaba wèndè mu, anyi ùpatuka, eyowa's wè, mu Loomo, ne ùkendakana ku malaba à cijila awu—awu. Yèyè nealwè kàbìdi apa. Nènku cintu cidi cikèmesha, ncyà ne, ndambu wa malòlò kumpàla kwà kuumukaye ku Loomo, bwà musangu wà kumpàla wà kwenzekaci kacya maalù malonda, ngondo kupwekaye ne kubwelaye mu lundimbà lwà dîbà ne ngondo. Ànu aci, civwà ncinyi? Ùjika ne mundìdimbi Bukènkè buleejiibwe bwà Mwànà. Mu lwendu elu, yèyè kwakula ne taatù wa ba-

Orthodoxes; nènku bônso bàdi mu dyumvwangana ne: “Paapà ùdi wenza bwalu ebu bwà bwobùmwè, bwobùmwè bwimpè bwà bwena mutumba.” Cìdi cyumvwika, ku dicì dyà mubidi, bu cintu cyà citambe kwikala cilenga cyà dikema civwa mwà kwenzeka. Kàdi ku dicì dyà nyumà, mmídìmà pa yóyì. Ne mutùdi twètù maèkèleeziyà, twètù ba-Presbytériens, ba-Méthodistes, ba-Baptistes, ne beena Mpenta, bafwànyine kukadibwinka mu bukooyà bwà mùshindù awu, pètù bamanyè ne Bible wetù ùdi uyiisha bishiilangane ne abi! Ncintu cyà dikema bwànyì mèmè, bwà mùshindù ùdi muntu muujiibwe tètè ne Nyumà mwà kusòmbà mu myaba bu nàнку kwamba ne: “Bìdi byumvwika byà nyumà bwà kwikala mu mwaba bu nàнку.” Bwànyì mèmè, s’bìdi byenza bwòwà.

³⁴ Mpindyewu, ngeela meeji ne nudi naaci muneemu mu Phoenix emu. Bu muntu. . . Mbanganyi mwab’ewu bakàadiku bamòne mwaba wúmvwà muzòle Bikondo byà Èkèleeziyà abi? Elaayi byanza muulu. Ngeela meeji. . . Nudi numòna mwàkabizòla Mukalenge mu maulu, dilòòlò adi anyi? Ànu menemene mùshindù ùdibi bizola ku tabernacle kwàka awu. Bipwangane, ànu menemene mùshindù wàkacifilà Nyumà Mwimpè ku disonsodiibwa, kùkaadi bidimu bisàtù, ku tabernacle, s’ki cyòci aci cyenzeke mu maulu. “Mukana mwà bantemu bàbìdi anyi bàsàtù, diyì dyònsò dijaadikiibwè.” Nyumà Mwimpè ùvwa dyàmbedi mutentèmùka ku disonsodiibwa; mvwa mubizòle pa cibumba cyà ku cyambilu apu. Pashiishe kutùluka Yè ne kwenzaYe dishindikà dyàci, mùvwà ngondo ne Bukènkè byenda bipatuka, bipatuka, ne kulwa too ne ku Cikondo eci cyà Laòdikiyà kubwela cyàkàbìdì mu mídìmà yà wòò. Kàdi’s ki Yéyè udi upweka ewu ne ucishindikà pa ngondo, ànu pa dībà mene dìdì èkèleeziyà yònsò pamwè yikàdyungwija mu cimuku, cyà nsangilu wa maèkèleeziyà.

³⁵ Kabyèna bikemesha to, bu mwàkambà Yeshàayi ne: “Mídìmà ya mupimbu yidi pa buloba, pa cisàmbà eci.”

³⁶ Ndi mumanye ne kî mbyà luumu bwa kwakula kupiisha bulongolodi to, kàdi’s ki cimanyinu cyà nyama wa lwonji. Ki cintu mene cyàya neetù bulùdi mu cyòci aci. Cìdi cyenza cimfwanyi cyà nyama wa lwonji. Ncyèna ngàmba aci bwà kufiika munda to. Ndi ngàmba aci bwalu m’Bulelèà, bàna bèètù. Ditùkù nedilwe dyàjuuka Phoenix, ne pàmwàpa mèmè mumane kuya, kàdi nenumanye ne civwa ng’EMU MMÙDÌ MUKALENGÈ WÀMBA. Ncilelèlè. Ne mùshindù ùdi Nyumà Mwimpè munène awu mushindikè Mayiisha awu ne mudyanjile kwamba maalu, kaàyikù apangila musangu nànsha ùmwè! Kàdi citùdi twenda tubaabacila mu mídìmà ncinyi? Bwà cinyi bantu kabènakù mwà kutabuluka pàdì dībà kadiyi dyanji kuya apa’s? Dìmwè dyà ku matùkù àdì panshi aa, dībà nediikalè dimane kuya bikole, apu ngwèwè mumane kupeta cimanyinu aci, ne dībà adi kakwenaku. . . Kakwena cintu cikwabo nànsha cimwè

cyúdi mwà kwenza pa bwalu abu to díbà adi, nebàkubùcìkile mu ndongolwelu awu, ne udi mutwibwe cimanyinu kùdi ndongolwelu awu.

³⁷ Bwà cinyi kùyi ulwa kùdi Kilistò, kuujiibwa téntè ne Bukênkè bwà Èvànjeeliyò wa Yesù Kilistò, Bukole Bwèndè bubìishì bwà ku lufù bùdi mwà kukuvwija mudishikaminye abu, ne kukuvwija kandeyi kàdi katèeka pa kakuna? Nànsha mîdimà milwà bishi. Wèwè udi wamba ne: “Èè, bwà cinyi bivwa bikèngela twètù kucyenza? Bakwabo abo . . .” Teelejàayi, mpindyewu mene ke díbà dyà kucilekela cikenka, padibi byenda bitamba kushàala mîdimà apa. Ki pàdi Bukênkè bukenka bîmpè menemene, mpàdiBu mu mîdimà. Tudi misangu yònsò ne cyà kulekela Bukênkè bukenkeshà mwaba ùdi mîdimà awu.

³⁸ Muprofeta wàmba ne: “Mîdimà ya mupimbu neyìikalè pa cisàmbà eci,” ne ncyà bushùwà ne m’Bulelèlà.

³⁹ Mpindyewu tudi tusangana cìdi cyenze bwà ngondo àleeje bukênkè. Nzambi ùleeja, dyàmbedi, ku mboodi; pashiishe, ku Bwikadi Bwèndè Yèyè mwine; pashiishe mu maułu kuleejaYè cimanyinu. Ki pashiishe paapà kupatukayè mu Loomo, kuya kabwèla mu Pàlèstinà; ciine aci, bwà dîsù dyètù dyà buntu edi, bantu kwelabo mbila mikole ne kutwa mpala panshi, ne kukuukwila muntu awu. Nciyi nende cilumbu ànu mûndi nciyi cilumbu ne muyiishi udi mufwanyine kudiswika ne byà nàнку. Cyònsò cìdi ànu nyumà umwèumwè awu.

⁴⁰ Mbimwèke ànu bu ne mîdimà yà mupimbu mmisòmbe pa cisàmbà mu mùshindù wà beela meeji ne cintu cimwèpelè cìdi cikèngela kwenza nkuya mu èkèleeziyà ne kwikalaku ànu muntu mwîmpè, kufùnda dîna dyèbè mu mukàndà, ne kaacintu kampànda kakesè kàà kakàyi kuumvwika kàà ne: “Nzambi neànyunguluje lusapi paùdi ufwa, ne neàshintulule nyumà udi munda mwèbè awu, amutangije kudiYe.” Udi mutupakane. Paùdi ufwà, ànu mùdi nyumà udi pambidi pèèbè awu, ke muwikala wèwè kashidi. Ne vùlukàayi ne, Bafaalesa, Basadoka, ne bakwàbo, bavwa batèndeleeði bàà dikema.

⁴¹ Nzambi ùtu Nzambi wa mukawu. Ùtu ne mukawu, ne mMuswè mukàj’Èndè ikale mukezuke. Mmuswe bwà yèyè ikale virgo, mudilaminyine. Cintu nànsha cimwè pa buloba mu yèyè to, nànsha cimwè; ànu Dîyi Dyèndè mu kaabujima, citùpà Cyèndè. Tudi ne cyà kwikala citùpà cyà Dîyi. Kaciyi citùpà cyà twitabaayi to; citùpà cyà Dîyi! Kaciyi citùpà cyà èkèleeziyà to; citùpà cyà Mukàji-musela! Èkèleeziyà mmupìshìibwe, tudi bamanye ne yèyè ùyaaya ku mîdimà ya pambelu ayi, kàdi Mukàji-musela ùdi ubànda.

⁴² Mpindyewu bantu bìikalaku ànu mwà kutabuluka bwà katanci kakesè cyanàànà ne kujingulula cìdi cintu cinène aci ne nciyi’s we. Mmaleela adi enza nàнку. Mbantu bàdi—bàdi baswè kwenda mùdi bakwàbo bàà pa buloba benda amu. Kwèna

mwà kwenza aci to. Kwêna wa pa buloba to. Nudi nwela meeji ne mukàjì mwadija mu mushèètè mmufwànyine kujinga bwà kumanya nsuki yèndè ní mmiluka ne mundula, anyi mwònsò munùdì baswè kucibiikila amu? Nudi nwela meeji ne yéyè mmufwànyine kutuma meeji ku mùshindù uvwaye muvwale pìikalabi ne uvwa mwadija mu mushèètè, anyi muntu mulùme kampànda anyi? Ki mbafwànyineku kucyènza to.

⁴³ Nènkù ki bwà cinyi, leelù ewu, kùdi bintu búngì cyanààna bikààdi bìkèngela bwà twètù kutentula kùdi beena mutumba, anyi kùdi kampànda mwende luumu wa mu Hollywood, anyi modèlè kampànda, anyi cintu kampànda cyà mùshindù awu, mbwalu katwena banji kufwa kùdi Kilistò ne Dìyì Dyèndè to. Mbwalu kaayi ebu ne maèkèleeziyà? Tudi mu mîdimà, munkaci mwà kwenda kubaabata mu mîdimà. Yéyè wákamba ne: “Nekwikale mîdimà ya mupimbu pa bantu.” Mîdimà ya mupimbu pa cisàmbà mpindyewu!

⁴⁴ Biine byònsò abi bìdi byumvwija cinyi? Bìdi byumvwija eci ne, padi buloba. . . Cìdi cibwiciidije ngondo, mbwalu dî—dîbà. . . buloba bwakabwela mu mundidimbi wà dîbà, divwa didileeya pa buloba adi. Buloba mbubwele mu mundidimbi. Ki lutàtù lùdi naalu èkèleeziyà ndwòlù alu. Ki lutàtù ndwòlò alu lùdi naalu ba-Presbytériens, ba-Méthodistes, ne beena Mpenta. Ki lutàtù lutùdì naalu twètù bònsò ndwòlò alu. Buloba bùdi bùjika Bukènkè butùdì ne cyà kwikala kuleeya, bunyunguluka bubwelaMù, ne, pàdìbi bipítangana, bùdi bwelapù mîdimà.

⁴⁵ Ne maalu a pa buloba mmabwele mu èkèleeziyà, mu—mu dîna dyà dingumba, dîna dyà twitabaayi kampànda, ne “tudi batèndeledi ne byònsò *ebi* ne byònsò *ebi*,” kàdi nànsha nànkù bùdi buvila bukole bubiiishì bwà ku lufù bwà Kilistò bwà kushindika Dìyì Dyèndè divwà dyambiibwe mu ciprofeta bwà ditùkù edi. Kùdi mwà kwikala Bukènkè ànu ku Dìyì dyà Nzambi. Aci tudi bamanye. Nzambi, ku cibangidilu, wákamba ne: “Bukènkè bwikalèku,” ne bukènkè bwakiikalaku, dishindika dyà Dìyì Dyèndè dyàkambàYe adi.

⁴⁶ Mifitù, kufiikishiibwa! Buloba kujaalamanganabu ne dikenkeshiibwa dyà dîbà kùdi ngondo, kàdi kufiikishiibwabu. Ki cyàkenzekà menemene mu mubidi, anyi mu nyumà. Ànu mwàkenzekabi mu mubidi, bidyànjlila kuleeya mu mundidimbi ne bitwàmbila, ke cìdi cyenzeke menemene.

⁴⁷ Mpindyewu, tàngilaayi nùmonà kùdici cikoobeka. Bààbúngì bàà ku nwènù bansongà, kabyàkukèngèla bwà nukole nuboooke bwà nwènù kushiisha kucimòna to, nànsha byà munyi, panwikala bashààle ne mwoyi bidimu bikwabo bisàtù anyi binaayi.

⁴⁸ Ngondo mpindyewu, tudi mu Cikondo cyà Èkèleeziyà wa Laòdikiyà. Mu Cikondo cyà Èkèleeziyà wa Laòdikiyà, ku èkèleeziyà mikwabo yònsò eyi, Laòdikiyà, cyà ndekeelu,

èkèleeziyà wa civùmvù, Kilistò ùvwa pambelu pàà èkèleeziyà. Mubadi kanà yònsò wa Bible ewu's mmumanye aci. Bwàkabuulwibwa 3, Yèyè ùvwa pambelu pàà èkèleeziyà, Ûteeta bwà kwalukila cyàkàbìdi, ne kacya kààkambaku ne Yèyè mmubwele nànsha. “Kàdi aba bàdiYè mutambe kunanga, Ùdi ùbàtandisha ne ùbànyooka.” Mukenji neùtandishe ne neùnyooka aba bàdiYè munange. Mpindyewu, ùvwa ùkookola, ùteeta bwà kubwela; mìdimà mìCikàngile, ànu cìdi cyenzeke menemene. Bukènkè buvwa bukenka abu, kakùyi mpatà to nebùjime ànu bwònsò nkòòng katàtaaka. Byònsò abi nebìkadyènzè cimfwanyi cyà nyama wa lwonji. Ne tudi bamanye cìdi aci cyumvwija, ki cikondo cyà nshìikidilu ncyòci aci.

⁴⁹ Nzambì, ku cibangidilu, wàkatàpulula bukènkè ne mìdimà, ne cyòci aci kàbìdi ke cìdi Nzambì munkaci mwà kwenza. Nzambì ùdi ùtàpulula bukènkè ne mìdimà. “Ku cibangidilu,” mwàkambàYe, “bukènkè bwikalèku.” Mpindyewu, vùlukàayi ne, kakwèna mwà kwikala bukènkè kampànda pambelu pàà Dìyi dyà Nzambì to. Dìbà mene didi pambelu pààpa adi's n'Dìyi dyà Nzambì, dishìndika. Kuvwa mìdimà ya mupimbu pa buloba, diciima ne mafwima pa buloba, ki Nzambì kwamba ne: “Bukènkè bwikalèku.” Mpindyewu ambàayiibi tung bu ne kakuvwa kulwe bukènkè nànsha bumwè? Dìbà adi kabivwa mwa kwikala ne dikwacisha bwà Yèyè kwakula to. Kàdi pààkambaYè ne: “Bukènkè bwikalèku,” ne bukènkè kwikalabu, ushìndika ne Dìyi Dyèndè divwa dilelèlè. Bukènkè butùdi twendelamu leelù ewu ebu.

⁵⁰ Nènku Bukènkè bumwèpele butùdi mwà kwikala naabu leelù ewu, mu èkèleeziyà, n'Nzambì mwikale ushìndika Bukènkè Bwèndè kùdi lukòngo elu.

⁵¹ Lukòngo ne lukòngo lwònsò lùvwa ne cyalù citùpà bùngì kampànda cilùkòsela, civwà cyenzeka mu abo matùkù. Twètù bònsò tudi bamanye nànkù. Bapròfeta bàvwa bàlwa mu cyalu. Bòbò, Dìyi dyà Mukalenge divwa dilwa kudibo, bòbo baDyuumwa. Mwena *lùmònò*, mu Dipungila Dikulukulu, mbwena kwamba ne: “ewu udi Dìyi dibuuludiibwa kudiye awu.” Ne mùshindù ùdibo bàcìmanya, mbwalu ùdi udyanjila kumanya maalù ikala mwà kulwa. Nènku Dìyi dyà Mukalenge dyàkalwa kùdibo, cikondo ne cikondo cyònsò.

⁵² Yesù wàkambila Yone, anyi bwà Yone ne: “Yèyè nguvwa bukènkè buvwa bùbàlakana ne bùkenka, bwà katanci.” Bwà cinyi? Yeshàayi, bidimu nkama mwandamutekète ne dikumi ne bìbìdi kumpàla kwà kulediibwaye, wàkamba ne: “Kudi dìyi dyà ewu udi wela lubilà mu cipèèlè.” Maalaki, nshapita mwi3, mmwambe ne: “Monaayi, Ndi ntuma musanjeela Wanyi kumpàla Kwànyi, bwà kulongololaye njila kumpàla Kwànyi.” Nwamònu's, yèyè uvwa Dìyi adi diikale dishìndika. Dìyi divwa dilayiibwe bwà ditùkù adi, yèyè ùvwa bukènkè, bwalu yèyè uvwa munkaci

mwà kukùmbaja Dìyì diine divwa Nzambi mwakule bwèndè yêyè adi.

53 Nènku pàakalwà Yesù, Yone wàkamba ne: “Ndi ne cyà kujimina mpindyewu; Yêyè ùdi ne cyà kumweneka patòòke.” Ne Yêyè nguvwa bukênkè abu. Munda mwà bikondo byònsò, mwàkaakulà Nzambi bwà dîbà divwa dilwa adi!

54 Mmunyi mwàkapangila balombodi bàà èkèleeziyà abu kuCimòna? Mmunyi mwàkapangilabo? Mmunyi mwàkapangila Bafaalesa ne Basadoka abu kumòna’s? Yêyè wàkamba ne: “Kenketaayi Mifùndù, bwalu mu Yôyi ayi mmunùdi nwela meeji ne nudi ne Mwoyi wà Cyendèlèlèlè, kàdi Yôyi ayi’s ki Yidi yimfidila Mèmè bujaadiki.” Mmunyi mwàkapangabo kuCimòna, bàà bèètù? Mbwalu cikaavwa cyàmba mu ciprofeta ne bòbò nebenzè nàнку.

55 Ki mùdibi kàbìdi leelù ewu ne, mîdimà ya mupimbu yidi yilwa pa bantu, kàdi’s ki yôyi eyi! Nzambi mmwabanye Dìyì Dyèndè bwà kumweneshiibwadi ditùkù edi, ne ki Bukênkè bumwèpele butùdi naabu, ne Nzambi neénzè bwà muntu kampànda àmwèneshe Dìyì adi. Muntu kampànda neàcyénzè. Yêyè mmucilayè, ne Yêyè ùdi ùkwàta mudimu ànu menemene mùvwàYe misangu yònsò mwenzè bilondeshile cyòci aci amu.

56 Kacya Yêyè katu mwanji kushintulula citembelu Cyèndè cyà mudimu aci to. Udi wènza ciprofeta cyà ciikala mwà kwenzeka, pashishe Ùtùma muntu kampànda bwà kucishindika. Nènku cidi cipicila pa mitù ya miliyò ne miliyò, bwalu, mîdimà mmibwikile buloba pa dîbà adi. Ne bantu mbanange mîdimà bikole kutamba mudìbo bananga Bukênkè, bwalu mîdimà yitu yitamba kusankisha.

57 Mvwa mumòne dinàya dyà Hollywood, àbìdi àdi panshi aa, dyàmba ne: “Mwoyi udi ubanga paanyimà pàà dîbà dimane kubwela.” Aci’s ki pàdi lufù lutwàdija; binwinù byònsò byà maala byà bufùkù ebi, ke mudibo beela meeji ne badi benza vie. Bàdi bapùnga ne lufù.

58 Nzambi, ku cibangidilu, wàkatapulula bukênkè ne mîdimà. Yêyè ùtu misangu yònsò ànu mwenze nàнку. CidiYe wenza ncinyi? Ùdi ùyicincimika, ku bukênkè bùdi bùlwa abu, Ùdi ùcincimikila mîdimà ku luseke lukwàbo lwà buloba.

59 Nènku ke cyòci aci menemene cyàlwà kwenzeka mpindyewu. Mpabwipi menemene ne ditùkù kubangadi. Mùtootò wà mu dindà mmupatuke bwà kusekelela dilwa dyà ditùkù. Ne Nyumà Mwimpè uleeja Bukênkè Bwèndè. Kulwalwa cikondo ciikalà Bukênkè ne mîdimà ne cyà kutapuludiibwa, cimwè ku cikwabo. Èkèleeziyà ne bulondyanganyi bwèndè neàngate dîyi dituma dyà ditùkù; ne Kilistò ne mulayi Wèndè Dìyi-Bukênkè neàye mu Dyambwibwa. Ki cintu cimwèpele cidi cibàshàadile bwà kwenzabo aci. Nditùkù, leelù ewu, nkabundubundu kàà ditùkù dipyadiyà, bwà bàábúngi bàdi bindile Dilwa Dyèndè.

60 Bantu bààbúngì, bímpè bàà meeji matòòke leelù ewu, aci's ki cidi cilàkusha myoyi yààbò kapyà, bantu bààbúngì, bímpè bàà meeji matòòke bu Màriya ne Yòzèfu. Bàvwa bafumina ku diifesto, kàdi kushiyabo Yesù. Bantu bààbúngì bàdi benza cintu cimwècimwè aci leelù ewu, beela meeji ne Yèyè ùdi naabo. Mpindyewu, ndi muswè kunushikikila kaabukènkè kakesè aka, bwà kunuleeja mùdi Dìyi dyà Nzambi kadìyi mwà kupangila.

61 Twètù bònsò kaaba aka, mu mappingaja emu, bàdi beena Kilistò, tudi twitabuuja ne Yesù Kilistò uvwa Dìyi dyà Nzambi, dimwènèshìibwe. Tudi twitabuuja ne Yèyè uvwa mulediibwe kùdi virgo. Yèyè nguwwa tabernacle muvwa Nzambi wa Bukole bwònsò mwele nntenta musòmbèle, panu pa buloba apa. Kàyi ànu muprofeta patupu to, kàyi ànu muntu wetù wa patupu ewu to, kàdi Nzambi Yèyè mwine mumwènèshìibwe mu mmwenekelu wa muntu. Yèyè uvwa *Emanùwèle*: "Nzambi neetù." Tudi twitabuuja nàнку, ne mwoyi wètù wònsò. Nènku mpindyewu monaayi pàdi Marta anyi. . .

62 Màriya's wè, eyowa, ne Yòzèfu, beela meeji ne Yesù uvwa naabo, bavwa bòbò ànu bàdifwanyikijile mu lungènyi ne Yèyè ùvwa naabo, beela meeji ne: "Bìdi ànu ne cyà kwikala bímpè. Yèyè ùdi ne cyà kwikala neetù." Kàdi bavwa batupakane bibi be. Kàvwa naabo to.

63 Bààbúngì be leelù ewu, bantu bímpè bàdi mùshindù awu. Bàdi beela meeji, bàdi bamòna díbà dyenda diseemena, bamanye ne cintu kampànda cidi cyàmbà kwenzeka, cidibo benza ncinyi? Bàdi baya kashààla beena èkèleeziyà, beela meeji ne Yèyè udi naabo. Bàdi bàlabulangana ku cyanza ne muyiishi, beela meeji ne ki cyònsò cidi cikèngela kwenzabo: "Yèyè ùdi naabo." Bashindika anyi babàtiiza mu mùshindù kampànda, ki cyònsò civwà cikèngelabo kwenza aci, beela meeji ne Yesù ùdi naabo. Mwanèètù wa balùme, mwanèètù wa bakàji, ànu mùvwà Màriya amu, Yòzèfu, bàà kale abu, bantu bàà meeji matòòke ànu bàà menemene, kadi nànsha nàнку mbatùpàkàne.

64 Nsòmbelu webè ùdi ùjaadika ne Yesù ùdi neebè anyi kèna neebè to. Nsòmbelu webè ùdi ùleeja ne anyi Yèyè ùdi ùsòmbèla kaaba aka, anyi Yèyè ùcidi ànu mu maulu Èndè amu anyi to, cyònsò cyùdi aci. "Byenzedi bìndì Mémè ngenza nenùbyènzè pèènu." Mmunyi mùdi mufwanyine kwikala ne Kilistò munda mwèbè, ne pashìshe Nyumà mwine ùdi munda mwèbè awu uvila Dìyi Dyèndè, wangata twitabàayi kampànda pa kaaba kàadi? Kacyèna mwà kucyenzaku to. Yèyè's mmufwànyine kuDìcimuna pa kuvila Dìyi Dyèndè Sungasunga.

65 Ànu bwalu kampànda mufilePù dyumvwija dibì anyi? Udi ne Bible, udi mwà kubala ànu mùdi muntu mukwabo yònsò ewu. Ikala ne meeji matòòke.

66 Davidì wàkamba ne: "NuMutèèkàayi misangu yònsò kumpàla kwènù." Twikàle bamanye ne patùdi tutwilangana

ne cidimu cipyacipyà eci, tudi tutwilangana nààci mu bukole bwà dibiiika dyà ku lufù dyà Kilistò. “Yèyè ùdi misangu yònsò kumpàla kwànyì. Mémè ncyàkunyungishiibwaku to.”

67 Monàayi mùdi Dìyi kadìyi mwà kupangilaku to. Màriya ne Yòzefù . . . Mpindyewu bwènù nwènù, nwènù balunda bàànyì bananga beena Kàtòlike, bàtù bambe ne Màriya uvwa maamù wa Mvidi Mukulu. Màriya kàvwa nànsha mene maamù wa Yesù to, kuleka byà diikala maamù wa Mvidi Mukulu abi. Mmunyi muvwaye mwà kwikala nànkù? Bushùwà. Kakwènakù musangu nànsha ùmwè ùtuYèku mumubiikile ne maamù to; nànsha kakesè.

68 Bàvwa balwa kudiYe musangu kampànda, bàmba ne: “Mamwèbè ne bàna bèènu mbindile pambelu.”

69 Yèyè kutàngila disangisha Dyèndè, wàmba ne: “Maamù Wanyì nganyi? Bàna Bèètù mbanganyi?” Kutàngilayè bayiidi Bèndè, wàmba ne: “Aba bàdi bèna diswa dyà Taatù Wanyì, ki bàdi maamù Wanyì, Wanyì. . .”

70 Ku nkùrusè, pavwaYe munkaci mwà kupùnga ne lufù, Wàkamba kàbìdi cintu cìmwècìmwè aci. Kwambilaye Yone, Yone ewu, muntu ewu ne: “Mwànà wa balùme, mona mamwèbè!” Ki nne: “Maamù, mònà mwanèèbè wa balùme to.” “Mukàji, mònà mwanèèbè wa balùme!” To, nwamònu’s, kavwa maamù wa Nzambì to.

71 Yèyè ùvwa ànu difù disomba dyàkakwàta nààdi Nzambì mudimu; kì nkutamba mukàji kanà yònsò ùdi Nzambì mwà kupangadika bwà kukwàta nendè mudimu to. Mmufwànyine kukwàta mudimu ne difù (dyèbè) dyà mwoyi wèbè, bwà kwamba patòoke Mwàn’Endè, bu wèwè—bu wèwè ànu mwà kuMulekela ùcyenza. Nwamònu anyi? Kayi maamù wa Mvidi Mukulu to. Kuvwa ne cyà kwikala disansakata, nànsha bwa kwikalaci dimiinu dyà Màriya. Yèyè kavwa nànsha dimiinu dyà kùdi Màriya to.

72 Civwa, cintu cyònsò mu kaabujima, civwa n’Nzambì, Mufùki awu. Piikala Adama wa kumpàla kwaka awu mufùkiibwe kakùyi taatù ne maamù, Adama Mwibìdi uvwa cintu cìmwècìmwè aci. Ne cintu nànsha cìmwè cishààdile ku aci kacivwa cifwànyine kuMuteeka pamwè Nendè to. Ncyà bushùwà. Nzambì umwèumwè awu, Wàkafùka mubidi mùvwaYè Yèyè mwine musòmbèle.

73 Mpindyewu tudi tusangana ne, tangilàayi mùdi, tangilàayi, piikalabi ne Màriya ùvwa maamù wa Mvidi Mukulu, mwàkatupakanaye, muntwamu. Yèyè ne: “Mémè ne tatw’Èbè tudi baKùkebe ne binsonji.” Uvila dileediibwa dyà kùdi virgo, “Tatw’Èbè, Yòzefù, ne mémè, tudi baKukebee.”

74 Tangilàayi Mwànà wa nsongàlùmè wa bidimu dikumi ne bibìdi awu, Mwànà wa balùme wa bidimu dikumi ne bibìdi awu, wàmba ne: “Kanwèna bamanye ne Ndi ne cyà kwikala

mudifile ku maalu a Taatù Wanyì, nkokangana ne mangumba awu kuntwaku anyi?” Mpindyewu, bu Yèyè ne, mmudifile ku maalu à Yòzefù, nùnkù Ûvwa kwikala ùsanganyiibwa ku ditanda dyà mabaya adi. Yòzefù kavwa tatw’Èndè to. Nzambì nguvwa Taatw’Èndè. “Kanwèna bamanye ne bivwa bikèngela Mémè kwikala mudifile ku maalu a Taatù Wanyì anyi?” Kuntwaku, ne bidimu dikumi ne bìbìdì, ne bakwidi balongeshiibwe abu. Kayi muyè ditùkù nànsha dimwè mu kàlaasà, kàdi nànsha nànkù bàakakema lungenyi alu. Nènku tangilàayi. . .

⁷⁵ Yèyè uvwa Dìyì. PààkalediibwaYè, Ûvwa Dìyì. Ûcidi ànu Dìyì. Monàayi, Dìyì kadyàkwitabakù cintu citentula to. Yèyè ne: “Mémè ne tatw’Èbè tudì baKukebe ne binsonji.”

⁷⁶ Yèyè ne: “Kwèna mumanye ne Ndi ne cyà kwikala mudifile ku maalu a Taatù Wanyì anyi?”

⁷⁷ Kutandishaye mamwÈndè Sungasunga? Bwà cinyi? Ûvwa Dìyì. Kuvwa mwà kwikala lukonko mu meeji à muntu kampànda, pàvwà Màriya ewu, wákamba musangu kampànda ne “Nyumà Mwímpè” mmumubwikile ne mundidimbi ne kulelaye Mwànà wa balùme, ne pashiishe kubiikila Yòzefù apa ne ki taatù. Dìyì kadyèna mwa kupangilaku to. Kadyèna mwà kupangilaku to.

⁷⁸ “Kanwena bamanye ne bivwa bikèngela Mémè kwikala mudifile ku maalu a Taatù Wanyì anyi?” Ne Ûvwa mudifile ku maalu a Taatù; kî—kî nku à Yòzefù, wenza biibi ne—ne midimu ya dikoona mabaya to. Ûvwa mudifile ku maalu a Tatw’Èndè, ùlongolola cìdìdì cyà ntèndeleeleu cìvwàbo naaci mu ditùkù adi adi. “Kanwèna bamanye ne Ndi ne cyà kwikala mudifile ku maalu à Taatù Wanyì anyi?” Eyowa’s, mukalenge.

⁷⁹ Bantu bààbùngì leelù ewu, mu yàbùngì ya ku èkèleeziyà milenga eyi, nebàbwele mu nsangilu wa èkèleeziyà awu; kî ne “nebàbwelemu” to, bàkaadimu. Mbamòne ne aci ke cintu cyà dyyenza menemene: “Mu bulunda, bulenga, katwèna mwà kudisanga bônso bwà cinyi?” Mona’s, s’mbateeta, bônso, munda mwà bidimu, bwà kuvwija ba-Méthodistes bônso ba-Baptistes, ne ba-Baptistes bônso ba-Presbytériens; Beena Mpenta mbateete bwà kubavwija bônso abu beena Mpenta. Kanwèna mwà kwenza nànkù to, kàdi nsangilu ki dyandamuna bwènù nwènù. Ki dyandamuna adi’s, cidi Bible wàmba ne nebènzè aci, nènku ki cyòci aci menemene cidibo benze. Èkèleeziyà mmilwe yà buunyàànà, eyowa’s, mukalenge, didisanga pamwè ne: “Mbímpe, twenzàayi bwobùmwe’s!”

⁸⁰ Bible mmwambe ne: “Mmunyi mùdì bàbìdì mwà kwendela pàmwè pàdìbo kabàyi bumvwangane?”

⁸¹ Bamwe bàà ku bôbò bavila dilediibwa dyà kùdì virgo. Byà pa lukama makumi mwandamukulu byà èkèleeziyà ya Mishònyì yidi yivila dilediibwa dyà kùdì virgo. Ne bàdi bàvila dibatiiza dyà Nyumà Mwímpè. Bàdi bàvila bimanyinu byà Dilwa Dyèndè,

Bukole bwà dibiika dyà ku lufù. Bàdi bàvila ne Yèyè kèna umwèumwè awu makèlèlè, leelù, too ne kashidi to. Mmunyi mùdi mwa kuvila, pàdibi ne Nzambì mmutèèke cimvundu cinènè cyònsò eci pa buloba bwalu mukàjì kampànda wàkeela mpatà ku katùpà kakesè kamwè kàà Dìyì Dyèndè? Sàtaanà uvwa mumwambile Bulelèlè, bònsò pa kuumusha kantu kamwèpele, kàdi ke kantu kàakatwala lutàtù lwònsò alu. Mpindyewu, pùikalabi ne màsaamà à mwoyi ònsò aa ne dibungama binùkàadi nukungamangana nàabi ebi, mbwalu katùpà kàmwe kààDì kàakeedibwa mpatà, nudi nwela meeji ne katùpà kakesè kàà mpatà kàdiku mwà kutubweja anyi?

⁸² Ki bwà cinyi Yesù ùdi ulwa bwà Virgo mudilama, mukezuke, mujiibwe tètè ne Nyumà Mwimpè, ne kàyi wa pa buloba to, kàdi wa Bukole bwà Nzambì. Kaa, mùshindù mwine ùdibi bilenga bilayà bwà kumanya ne kùdiku mùshindù wà kubwela mu Cisumbù eci's wè! Udi ubwelamu bishi? Kwàkucyenzaku mu didilamika ku bulongolodi to. Neucyènzè paùdi ubàtijiibwe kùdi Nyumà Mwimpè, mu Mubidi musokome wà Yesù Kìlistò, mubiishiiibwe Nèdè mu dibìikà dyà ku lufù, musùuludiiibwe ku lufù ne ku mpèkaatù. Ki mùshindù umwèpele ngwòwò awu.

⁸³ Mídimà! Mangumba manènè, ne cisumbù cinènè cyà bantu cìdisanga ne bàteeka mmwenenu yàabo pa Cyòci aci, nènku aci cìdi cikukùpa cikupingaja ànu mu dikonyangala dyà bwena divwàku ku cibangidilu adi's. Kakwenaku ditekemena nànsha dikesè dìbà adi to; wèwè udi muye kujike. Nènku bònsò bàà kudibo mbamweke ànu bu bàdi basaluke ne buunyaàna bwà maèkèleeziyà ebu, beela meeji ne Nzambì neikale naabu. “Èè, Bukalenge bwà bidimu cinunu nebùbanga pùikalala nsangilu awu mudisangishe yònsò kuntwaku, ne byenzi byònsò byà bukwàntèndeleele, ne bikwàbo,” ne bàkadiswikamu. Cidibo benza ncinyi? Benza cimfwanyi cyà nyama wa lwonji, bukole kampànda, kwikala bònsò bàdi kabàyi beena mangumba, ne bakwàbo, bìikala kabàyi mwà kudiswikaku nàabo abu, bàbàkangila pambelu. Tangilàayi ànu cyanàànà numòne ní cyènzeke.

⁸⁴ Ndi naaci cifùnda kaaba aka, ditùkù mene ditùdi... Mukalenge ngudi mucindeeje mu cidimu cyà 1933. Kàdi's ki cyòci ànu menemene mùshindù ùvwaye... mùshindù ùvwàCi cyàmbe, cilwa ànu mùshindù wùm wèwùm wè awu, mùvwà paapà mwà kuumuka ku Loomo, ne bikwàbo.

⁸⁵ Pàabu, s'mbantu bìmpè, kàdi batùpakane. Yòzefù ne Màriya bàvwa bantu bìmpè, kàdi batùpakane ànu byètù byà menemene ebi. Kàdi civwa ncinyi? Nzambì kukwata mudimu ne Mwànà wa balùme wa bidimu dikumi ne bìbìdì bwà kuleeja ne Dìyì adi didi ne cyà kushàala dikezuke, ànu civwaDi menemene, cyàkambaDi kumpàlampala ne: “Yèyè ùvwa mulediibwe kùdi virgo,” nènku ke civwaYe.

⁸⁶ Beela meeji ne Yêyè ùvwa naabo pàakayabo kushààla bà ku maèkèleeziyà apu, ne bikwàbo, kàdi kaCivwa nàнку to. Mpindyewu, kàdi bwà Basungula . . . Mpindyewu, aci mmîdimà, ne mvwa mwà kushààlapu bwà dikwàbo dîbà dijimà.

⁸⁷ Kàdi bwà Basungula, bàà musinga mukole ne babiikidiibwe, Bansantu bàà Nzambi, ndi nnwambila, cidimu cilwalwà eci ne: Shalom, ditalala dyà Nzambi!

⁸⁸ Dîbà ndyèdi! Bu ne mvwa mwikaleku kale wàwa kumpàla kwà matùkù àkafùkiibwa dyulu ne buloba awu, ne kutàngila panshi ne kumòna cintu cyònsò mu kaabujima, ne Taatù mungambile ne: “Mmu ditùkù kaayi mùdi mufwànyine kujinga bwà kwikala ne mwoyi?” Ndi mufwànyine kwamba ne mpindyewu, mpindyewu mene! Dîbà ndyòdi edi! Edi ndîbà ditàmbe bunène dikaadîku Èkèleeziyà mubwele, ànu pabwîpî menemene ne dilwa dyà Mubàki. Kaa, bikèngela bwà Èkèleeziyà mulelèlè wà Nzambi udi ne mwoyi ikale mu kapyà, ùlakuka kapyà, ne Bukènkè bwà Èvànjeeliyò bwikale bushindikiibwe munkaci mwàbo. “Juukà ukenke, bwalu Bukènkè bwáfiki kùdi,” Bukènkè bwà ditùkù edi. Yeshàayi nguvwa bukènkè bwà ditùkù dyèndè. Noa nguvwa bukènkè bwà ditùkù dyèndè. Bwà cinyi? Yêyè ùvwa ne Dîyi dimwèneshiibwe. Nèнку Èvànjeeliyò, Mèyi à Bible bwà ditùkù edi, ki Bukènkè bwà ditùkù adi’s. Cikondo kaayi cyà butùmbi citùdi ne mwoyi’s wè!

⁸⁹ Mpindyewu ne: “dîndà dilenga” mbwena kwamba ne *ditalala*. Mîdimà yidi munkaci mwà kudyungwija. Ncinyi cidiyi yidyungwijila? Bwà kuleeja Bukènkè. Yeshàayi 60:1: “Juukà ukenke, bwalu bukènkè bwáfiki kùdi.” Ki bwà cinyi ndi mwà kwamba ne: “Shalom,” Bukènkè bwáfiki kùdi, ditalala dyà Nzambi kùdi Mukàji musungula, kùdi Inàbànzà musungula; aba bavwa Nzambi, kumpàla kwà difuka dyà dyulu ne buloba, mubiikile bwà kupàtuka ne mulongolwele Cyòci aci abu.

⁹⁰ Bakwabo kabààkuCimònaku to. KabààkuManyaku kantu nànsha kàmwè pa Cyòci aci to. Bible ngudi mwambe nàнку. Ne Yesù mmwàmbe ne: “Muntu nànsha umwe kèna mwà kulwa kùNdi pàdi Taatù Wanyi kàyi mumukoke to, dyàmbedi; ne bònsò bàdi Taatù muMpèeshe nebàlwe.” Aci cidi . . .

⁹¹ Ki Yudaàsà awu mwimane apu, Bukènkè bùkenkela *apa*, kàdi munda mwà mwoyi wèndè mùvwa dimiinu dyà mîdimà. Pàakalwa diteetangana dyà makàndà, mîdimà e kudileejayi.

⁹² Ke mukàji mukesè, nyêyè ewu, muffikishiibwe yêyè yònsò, lwà pa mpàla *apa*, kàdi mwînshì *emu* muvwa dimiinu didyanjila kulongolola. Kàdi pàakalwà Bukènkè, Bwàkatangalaja mîdimà, ne dyakadileeja patòoke. “Twètù tudi bamanye ne Maasiyà ùlwalwa, ne, pàalwàYe, Yêyè neàtùleejè maalu aa.”

Yesù ne: “Mémè ki Yêyè awu.”

⁹³ Kadi Yudaàsà kuMwela mpatà, pèndè’s nguvwa ne cyà kwikala wèndela mu Bukènkè. Nwamònu’s, Bukènkè kuulu *eku*

kabwèna ne bwalu to; mBukênkè kwînshì *eku* bùdi ne mushinga. Bukênkè bùdi lwà kuulu *eku* nebwendè mu bwobùmwè, ne bikwàbo byònsò; kàdi pàdi bukole bulelèlè bwà Nzambì bubwela, kabwena mwà kwalukila kùdi dimiinu difwè *edi* to, adi nedileejibwe mu dingumba.

⁹⁴ Kàdi padiBu lwà kwînshì *eku*, dimiinu dishuwashùwàlè, didyanjila kulongolola, pàdi Bukênkè abu bùtùluka munda emu, bwipata mídimà yònsò mu wèwè, ne bükubweja mu bwobùmwè ne Kilistò. Yèyè uvwa ng'Ewu Wákakupèèsha Mwoyi kumpàla kwà difuka dyà dyulu ne buloba, bwà cyanààna kwàdyàkuCimònaku to, ki cidi Nzambì mwambe.

⁹⁵ Mpindyewu, nwènù Dimiinu didyanjila kulongolola, Shalom! Amen. Ditalala dyà Nzambì diikale pambidi pèènu, bwalu tukàadi pabwipi ne nshiiکیدilu mpindyewu. Tukàadi ku ndekeelu menemene. Netwàkulè bwa kasumbù aku, bwà katanci kakesè. Shalom!

⁹⁶ Bukênkè bwà Nzambì bwáfiki. Dîyì, Bukênkè, mbushindikiiibwe cyàkàbidi, bwà nwènù kumòna mamweneshiiibwa à mulayi wà Nzambì bwà ditùkù edi. “Kenketaayi Mifùndù, mu Yôyi amu mmunùdi nwela meeji ne nudi ne Mwoyi wà Cyendèlèlè.” Yôyi ayi's ki yidi yifila bujaadiki bwà ditùkù ditùdi ne mwoyi. Bukênkè bwà ditùkù ncinyi? Cidi Bible mulaye bwà ditùkù edi ncinyi? Nudi numòna ne ndìbà kaayi edi!

⁹⁷ Kabyena bikemesha to pàakabàtandisha Yesù bwà dibenga kwitabuuja Yone. Yèyè nguvwa bukênkè, bwalu muprofetà ukaavwa mwambe ne neàlwe. Nènku ke yèyè awu mwaba awu, bukênkè bumwènèshiiibwe. Kabavwa babùmone to. Kabavwa babuumvwa to; kwelabo meeji ne yèyè nguvwa Maasiyà awu, ne kwelabo meeji ne ncintu kampànda cikwàbo, anyi *cikansanga* cikwàbo. Bààkapanga kuCimona.

Yesù wàkalwa. Makênkè àbidi kaèna mwà kukenkesha musangu wùm wèwùm wè awu to.

⁹⁸ Kakwèna mwà kwikala bukênkè bwà èkèleeziyà ne Bukênkè bwà Nzambì bùkenka musangu wùm wèwùm wè awu to. Bikèngela ciikàle Bukênkè bwà Nzambì bwikale buumusha bukênkè bwà èkèleeziyà. Ne ke cidi menemene munkaci mwà kwenzeka leelù ewu. Nzambì ùdi munkaci mwà kutàpùlula bwena èkèleeziyà ne Bukênkè Bwendè bwà Dîyì dilaya dyà dìbà ditùdi ne mwoyi edi. Aci's m'Bulelèlè, mulunda wanyi. Udi mufwànyine kwikala kuyi muswè kwitabuuja aci to, kàdi wèwè indila ànu cyanààna kadi ujandule ne mmwòmò anyi kî mmwòmò. Kwindidi to, mbìmpè ubwele mpindyewu mene pàcidiku mpungà wa kubwelamu apa.

⁹⁹ Dîyì didi Bukênkè pàdiDi dishindikiiibwe. Pàdi ànu Dîyì, dilayè bwà ditùkù, kadiyi dishindikiiibwe to, dìbà adi kî m'Bukênkè to. Kadyèna mwà kwikala nànkù to. Piikalabi

ne Nzambi wákamba ne: “Bukênkè bwikalèku,” ne kakùyì dîbà nànsha dimwe dimwènèshìibwe to, kakwèna cimanyinu cyà bukênkè nànsha. Kàdi pààkamba Nzambì ne: “Bukênkè bwikalèku,” ne bukênkè kwikalabuku. Pààkalaya Nzambì Maasiyà, Maasiyà kulwa, dîbà adi Dîyì Dyèndè kuuladi ne Yèyè uvwa Bukênkè bwà dîbà adi. PààkalayaYe Noa, ne kulayaYe bakwaàbo, ànu nànkù, bàvwa bukênkè bwà dîbà adi.

¹⁰⁰ Nènku kùdi Bukênkè bwà dîbà edi leelù ewu, n’Yesù Kilstò mu bukole bwà dibìika Dyèndè dyà ku lufù, Dîyì Dyèndè didi dilayìibwe bwà ditùkù edi. “Byenzi bîndì Mémè ngenza, nenùbyènzè pèènú; nenwénzè binène bipite ebi, bwalu Nyààya kùdi Taatù.” Byenzi binène bitambe, bintu bitambe byakenzaYe bunène? Nudi nuciitabuuja anyi? Mémè ndi nuciitabuuja. Bidi bimwèka bipwekèle. Bidi bimweka bu bìdi bipicila bantu pa mitù. Tangilààyì pavwaYe pa buloba apa, mmunyi munudiku mwà kwenza byenzi “bitambe” bunène? Ndi mucikùdimùne, misangu yàbùngì ne, “bipite bùngì,” kàdi byà mwómùmwe. “Bitambe bunène,” mwàkambàYe mu Yone Munsantu 14:12 ne: “nenwénze byenzi binène bitambe ebi.”

¹⁰¹ Nukààvwaku bamòne? PààkakudimunaYe màyi mvinyo, Wàkangata màyi, dyàmbedi; cintu cimana kufuka, e kucikudimuna mvinyo. PààkadiishaYe bantu binunu bitaanu apu, Wàkangata mushipa wùvwàku musangu kampànda wòwèla mu màyi, kuwùcibula, kuwàbanyayè, e kuvudija bufùki. KwangataYe dyàmpà divwa musangu kampànda blé, mwosha mwenza dyàmpà, kudicibula ne kudyàbànyinaye ba . . . kudipèeshaye bantu, ne kwalukiladi kàbidì. Úvudija bufùki’s!

¹⁰² Kadi mu matùkù a ndekeelu, mùdiku kakùyì cimanyinu cyà bufùki to, Yèyè ùdi wàkula ùcìtwala mu bufùki, nànsha byà munyi, bileeja ne n’Nzambì umwèumwè uvwa ku cibangidilu awu. Yèyè ùdi mwà kufùka nshindì, Ùdi mwà kufùka cyònsò cidiYe muswè kwenza aci, bwalu Ùdi Nzambì. “Nenwénzè bintu binène kutàmba ebi, bwalu Ndi nya ku Taatù Wanyì.” Dîyì kadyèna mwà kupangilaku to, ne bikengela Dyòdi dimwèneshìibwè ne bikengela dyùlè. “Nenwénzè binène bipite ebi,” kabìyi divudija to, kàdi ditwala mu bufùki ku dyakula.

¹⁰³ Monaayi Dîyì mpindyewu pààkalayaYe. Mpenyi, mpenyi patukàadi, dîbà adi’s? Tudi ne mwoyi mu ditùkù kaayi’s? Dîbà didi cinyi? Dimwenesha dyà Dîyì dyà Nzambi, ànu mùdidi mu mèbà ònsò. Nudi ne Mukenji pa *Bikondo Muandamutekètè Byà Èkèleeziyà*. Tangilààyì ànu menemene mùdi yònsò wa ku nyama ayi wàkapàtuka, ne Nyama yàkayìlonda ayi. Tangilààyì ní kabyena ànu binwangane mu cikondo cyà balongolodi, ne cikondo cyònsò, ànu menemene muvwàci ne cyà kwikala, menemene civwà Dîyì dyàmbe. Nènku ki mwàmwenesha Nyumà Mwímpè leelù ewu ànu menemene cidi Bible mwambe ne necyènzekè aci.

104 Tudi tumona mundidimbi mu mauilu ne pa buloba, ne bintu byònsò, ne nsangilu ne bikwàbo byènda bidìlongolola.

105 Nènku tudi tumona, munkaci mwà biine byònsò abi, Èvànjeeliyò wa butùmbi wa Yesù Kilistò, mulaya bwà ditùkù edi, ùDimwenesha. Tudi ne mwoyi mu cikondo cilenga cyà dikema. Shalom nwênù badi ne Dìyì munda mwà mwoyi wènù, basungula kumpàla kwà difuka dyà dyulu ne buloba, bwà kutèèleja Dìyì bwà ditùkù edi. Kabiyi nànkù bwèbè wèwè to, ncidimu cibì bwèbè wèwè kumpàlà eku. Pawikala musungudiibwe nànkù, mbuloba bunènè bwèbè wèwè kumpàla eku, anyi ditùkù dinène, cidimu cinène cilwalwà mpindyewu eci, cidimu cipyacipyà.

106 Ki nkubilekela bipweeka ne mâyi to; bantu bààbúngì batu bateeta babilekela bipweeka ne mâyi mu cidimu cipyacipyà, kubyàluja ditùkù didi dilondà.

107 Byenze bu kaabwalu kakesè kâmvwà mbala mu dindà kampànda. Mukàjì kampànda wela bayèndè lubila, uvwa mujuuke pa bwebwebwe mupatuke ne mukangate cibejibeji cyà dindà, nènku mwikale ubalagana ne cibejibeji cyà dindà aci. Kwambaye ne . . . Mukàjì kwambayè ne: “Kudiki bupyabùpyà mu nguumu anyi?”

Yèyè ne: “To, ànu bintu bimwèbimwè abi, cibì bantu bakwàbo.”

108 Ki mùshindù ùdibi leelù ewu awu, cintu cìmwècìmwè aci. Tudi ne bulongolodi bupyabùpyà, dilongesha ànu òmwèdimwè dyà kale adi; ànu kucisekenkeja eku ne eku, muntu kampànda ne kaammwenenu kààci kaya mu *nùnkù* anyi mu *nàka*.

109 Edi nditùkù dipyadìpyà. Àlèluuyàh! Edi nditùkù didi dikengela twètù kajuuka ne kukenka, mu Bukolè bwà Yesù Kilistò. Mìdimà ya mupimbu yìdi yìlwa pa buloba; s’bivwa bikèngela bwà kwikalaku ditùkù dipyadìpyà bwètù twètù, èyowà’s, cyà bushùwà, tucyènza ànu mudiYe ùcyènza amu. Kàdi kudimukila ku Dìyì Dyèndè bwà kumona mulayi ùdi mulayìbwe bwà ditùkù edi, dîbà adi neùmanye ne udi ne mwoyi mu Bukènkè bwà ditùkù anyi to. Kushintulula kabala matùkù kî nkushintulula cikondo to; cidi ànu kushintulula kabala matùkù cyanààna.

110 Mpindyewu ne ntema yònsò tèèlejàayi. Enzaayi mwàkenzà Davidi amu, tèekaayi matùkù ènù àcilwalwà mu cyanza Cyèndè. “Mmunyi? Mmunyi mùndì mwà kumanya cyà dycenza, Mwanèètù Branham?” Tèeka matùkù èbè àcilwalwà mu cyanza Cyèndè. Ní ncinyi cyònsò cyàlwà aci; mweyemene Yèyè. Yèyè ùdi Dìyì, mpindyewu manyàayi. Davidi wàkamba ne: “Cikondo cyèndè cidi mu cyanza Cyànyì. Mweyemene Yèyè dîbà dyònsò. Ikala misangu yònsò ànu muMweyemene.” Úvwa mumanye Ewu uvwa mulame matùkù àcilwalwà, Davidi úvwa mumanye, ki bwà cinyi úvwa mwà kwamba nànkù. Kudi ànu Umwèepele udi mulame

matùkù àcilwalwà, n’Nzambi. Pa nànkù, Yèyè ngudi mulame ma—matùkù àcilwalwà, lekela Yèyè àkukwàtè. Èyo.

111 Bamwè bantu batu bàmba ne: “Kadi, Mwanèètù Branham, mèmè’s nkààtu muteetètèete.”

112 Kadi anji indilàayi kakesè. Lutuulu mbukolè. Lutuulu mbukolè bwà Nyumà Mwimpè. “Aba bàdi bindila Mukalenge nebàvwijulule makàndà abo mapyamàpyà.”

113 Wèwè udi wamba ne: “Mmunyi mûndi mwà kwindila kàbìdi ntanta?” Tungunuka ànu ne kwindila. Paùkàadi mumane kwenza cyònsò cyùdi mwà kwenza bwa kushààla mwimane, dîbà adi imana, wamònu’s, imana ànu cyanààna. “Mmunyi mungààcyenza’s?” Imana! Yèyè mmwambe ne m’Bulelèlà, ne m’Bulelèlà. Mmwambe ne necyènzeke. “Munyi?” Ncyèna mumanye to; kàdi necyènzeke. Yèyè ngudi mwambe nànkù. Yèyè ngudi mucilayè. Piikalabi ne Yèyè ngudi mucilayè, necyènzekè. Kwajiki. Kacyèna mwà kunyanguka to.

114 Nànkù mpindyewu vùlukàayi ànu ne, Nzambi wakangata binunu ne binunu byà bidimu bwà kuuja mulayi Wèndè wa Musungidi uvwa ne cyà kulwa. Bidimu binunu binaayi, Nzambi kwangata bwà kûja mulayi awu. Kadi Yèyè uvwa mumanye, kubangila ànu ku cibangidilu aku, dîbà menemene divwaci ne cyà kwenzeka. Úvwa mumanye; muntu mukwàbo nànsha umwe kavwa mumanye to. Úvwa mwambe ànu ne necyènzeke. Nènku pààkenzekaci, bantu bavwa mu cibwejàkàji dyà kacya, mu mùshindù wà ne kabààkamanya mwà kuciitaba nànsha. Cintu cìmwècìmwè aci’s ncyènzeke kàbìdi’s! Citu misangu yònsò ànu cyenzeka, kacìtu cipangila nànsha, nseke yònsò yìbìdi, misangu yònsò.

115 CyàkenzaYe munda mwà bidimu ebi ncinyi? Wàkaleeja cimfwànyi cyà Yèyè ulwa.

116 Wàkacìleeja mu Yòzefù. Bu nwènù mwà kutangila nsòmbelu wa Yòzefù; mukìna kùdi bàna bààbò, munanga kùdi tatwèndè. Bwà cinyi? Bwalu yèyè uvwa wa nyumà, bwalu wàkamona bikèèna-kumòna. Bakwàbo kabàvwa bamòna bikèèna-kumòna to; bàvwa bankambwa kàdi kabàvwa bamòna bikèèna-kumòna to, kuumvwija bilòòtà. Kadi bààkamuumvwila mukawu. Nènku bààkamusumbisha ku binjànjà byà mfranga bitwe ku makumi àsàtù, kupatukaye mu ciina muvwaye ne cyà kwikale mushipiibwa amu, kusòmbaye ku dyàbalume dyà Pàlò. Nènku pàvwàye ùjuuka mu nkwaswa wa butùmbi, mpungi uvwa ùdila ne: “Twayi cinù pànshì; Yòzefù nyèyè awu ùlwa!”

117 Ànu menemene cyàkenzà Yesù, mùsòmba ku dyàbalume dyà Nzambi. Nènku pàdiYe ujuuka mu Nkwasa wa butùmbi, mpungi neyidile. Ne cinù cyònsò necitwe pànshì, ne cijikula Yesù Kilistò, Mwàna wa Nzambi. Menemene’s.

118 Wàkacìleeja mu bifwanyikijilu byà Davidi, pàvwàye kuulu pa . . . mfumù mubengùbwe ùbandila Yelusàlèma, ùdila mwadi.

“Mmisangu búngì kaayi ìngàakaswà kukukungwija, mudi nzòòlo ukungwija twànà twèndè, kàdi wèwè kwakaswa to.”

119 Munda mwà bikondo, Yèyè kucileeja mu bifwaànyikijilu, mumanye ne dîngà ditùkù cimfwanyi cyà ndekeelu necyùlè, ne dimweneshiibwa mu kaabujima dyà Maasiyà Wendè mulaya nedikaleku. Nènku pààkalwa mulayi mu kaabujimà, nànsha muvwaYe muwùfwanyikije. . . Ku ditùkù ne ku ditùkù, ku cidimu ne ku cidimu, Úvwa uwùfwanyikija. Nènku pààkafikabi ku bulelèlè, kabààkacìtabuujaku to.

120 Yèyè mmwenza cintu cimwècimwè aci, mucifwanyikije, ne mucilèèje mu bikondo byà èkèleeziyà, ne bikwabo byònsò, too ne ku dîbà ditùdì ne mwoyi edi, kadi bantu bàdi mu mîdimà ya mupimbu, mbimweke ànu bu ne kabèna mwà kucyùmvwaku to. Cintu cyà dibungama be!

121 Ànu mùdibi pa kumòna nsongàalùmè mwab’ewu, mwîmpè, munène, muntu mupàyàme ne nsuki yèndè, yidiye mwenze mvwangala mùtù bakàji benza amu, muvwale diyò, ne mupilu bulewù mulebelele, ne bisabaata byà violet ku makàsà. Mmulùmè anyi? Kaa, ekèlekèle, ncintu cyà cyenza bwòwà kaayi bwà kucibiikila ne mmuntu mulùmè’s! Ncintu kaayi cyà kubiikila ne mmuntu’s we! Ncyà bushuwa’s.

122 Kumòna mukàji kampànda, uvwa ne cyà kwikala mulenga ne mukezuke awu, úpatuka pambelu muvwale mùpanù wà muntu mulùmè, mucì wà mfwanka ku mishiku, ne nsuki mibèbula. Cintu kaayi cyà kubiikila ne mmukàji’s! Yesù wàkabiikila Mariyà ne, “mukàji.” Kabivwà nànsha bikengela àbikidiibwe nànu to; ànu cikàji.

123 Monàayi, nènku dîbà! Bwà cinyi? Misangu mikwàbò bantu bàdi balaka mukana ne beela meeji ne bàdi ne meeji matòòke abu, kadi mîdimà ya mupimbu mmibabucikile mu cyòcì eci. Bible mmwambe ne nebìikalè nànu. Balàayi Yeshàayi 6 bwa kujandula ne bakàji ní kabavwakù ne cyà kwenza mùshindù awu mu matùkù a ndekeelu, ànu menemene cyàkamba Bible ne ki cìikalabo. N’Dîyi dyà Nzambì. Yelèmiyà ne bakwàbò bashiilèshìilàngàne bààkaakula bwà dîbà ditùdì ne mwoyi mpindyewu edi, bwalu bààkamòna ndekeelu kacya ku cibangidilu. Ke patùdi tumòna bintu ebi, ne mîdimà ya mupimbu pa cisàmbà.

124 Èyowà, byàkangata Nzambì binunu byà bidimu, bààkùpa. . . ùleeja bifwanyikijilu ne bikwàbò byònsò, kàdi ndekeelu wa byònsò kabààkaMumanya pààkalwaYè to, nànsha muvwaYe muleejìibwe mu cimfwanyi mu Yòzefù ne Davidì ne Eliyà, ne mu bònsò amu. Yèyè wàkaleejìibwa mu cimfwanyi kudibò, kàdi pèètù katwena mwà kuumvwa ne bwà cinyi kabàvwa baCimòna to. Nènku ke cyòcì aci, ànu mu Mifundu menemene ne: “Mu Betèlèhèmà wa Yudaaya,” Yèyè úvwa mwà kulediibwa. Tudi tusangana ne mu Mifundu, mùshindù úvwàYe ne cyà kulediibwa,

virgo. “Virgo neimite difù ne neàlele Mwànà, ne babiikila Dîna Dyèndè Emanùwèlè.”

125 Bwà cinyi bààkaMushipa? “Bwalu Yèyè wàkaDivwija Nzambi,” Pende ùvwa Nzambi. Cyà bushùwà, bàdi bacitaba. “Yèyè wàkamba mùdìYe uDivwija Nzambi, mwikàle mwomùmwe ne Nzambi, wàmba ne: ‘Mémè ndi Mwànà wa Nzambi.’” Mona’s, ki civwaYe!

126 Bible mmwambè ne Ùvwa ne cyà kubiikidiibwa ne: “Mubedyanganyi, Mfùmù wa Ditalala, Nzambi wa bukolè, Taatù wa kashidi, Mukèmeshyanganyi!” Ki civwaYe ncyôci aci. Bwà cinyi kabavwa bumvwa ciine aci?

Kabyèna bikemesha to pàakambaYe ne: “Bivwa bikèngela bwà nwènu kukenketa Mifundu.”

Bôbò ne: “Twètù tudi bayiidi bàà Mòsà.”

127 Yèyè ne: “Bu ne nuvwa bayiidi bàà Mòsà, nuvwa mwà kummanya Mémè. Mòsà ngwàkafùnda bwà bwalu Bwànyì.” Kadi bôbò kabàakacimanya to.

128 Ne dîbà dikaadi cyàkàbidì pa bantu, dyàyàbò ku twitabàayi yàbò ne bikwàbò, pamutu pàà Yesù mulenga awu. Ncyà bushùwà. Bintu binènè bidì byenda bijuuka ebi, nènku bidì munkaci mwà kutàmba kubinyija buludi mu mîdimà ne mîdimà mitàmbe. Nènku Nzambi ùcyàmba patòokè mu Dîyi Dyèndè, ku bimanyinu ne maalu à kukèma mu maulu, ne udyanjila kuleeja, wamba maalu àdì enzeka ànu menemene pa dîbà ne mu kasunsa, bivwa ne cyà kwenzeka abi. Ne pashîshe mbatùngùnùke ànu ne kwenda kuya mu mùshindù ùmwèùmwe awu. Mbyenze ànu bu ne kabèna ànu mwà kupanga kucyenza to. Bantu bîmpè, èyowà’s, mukalenge, benza cintu cimwècimwè aci mpindyewu ànu mwàkacyenzabo musangu awu amu.

129 Tudi bifùkiibwà byà cikondo. Nzambi ùdi bifùkiibwà byà Cyèndèlèlè. . . Nzambi ùdi cifùkiibwà cyà Cyèndèlèlè. Kacya Yèyè kààkabangaku to ne Yèyè kàadyàkwikalaku ne ndekeelu to. Pa nàнку bwà cinyi kubenga ànu kudîilambula kudiYe? Bandulukàayi, nukènkè ne disànka dyà Bukènkè bwà Dîyi dyà Nzambi bùdì bùteemà leelù ewu ebu. Bantu kabènakwà mwà kumòna Cyôci aci bwà cinyi, balunda bàànyì?

130 Tèelejàayi, mémè ndi mwanèènu. Ndi mununange. Kî mbifwanyineku kwikala bipèpele bikolè bwànyì bwà kutwala cyanààna, piinaapù, uya kumpàla wamba ne: “Kaa, èè, mémè’s nèndyè cibàngà pa Cyôci eci, nènd-. . .”? Aci kacitu mu mémè to. To, mukalenge. Pàdibi ne n’Dîyi, n’Dîyi’s. Nzambi atùkwacisheku bwà kwimanyina cintu cidì cilelèlè aci! Èyowà’s, mukalenge. Mbifwanyine kwikala bîmpè, cyà bushùwà, udi mufwanyine kutamba kutuuciibwa tuumapì paanyimà. Kàdi ncinyi cîndì, cingiikala mwà kwenza pangîmana Ditùkù adi piikala minu minyanùnùke ayi yimfunkune mu mpàla yàmba

ne: “S’uvwa mumanye cìdì címpè, kadi’s wàkapangila bwà kutwàmbila”? Yoyòyò! To!

¹³¹ Nèngiikalè bu Pòlò ne: “Ncyèna mudikande bwà kunwambila Mubelu wònsò wà Nzambì to.” Mashi à muntu nànsha umwe kaènà pambidi pàanyi to. Lekèlaayi Mubelu awu uye kwònsò kùdiwu mwà kuya aku. Aci’s mBulelèlà. Nzambì mmucimanye, ne Ûdi ucìtwa nyama ku mikolo wàmba ne m’Bulelèlà.

¹³² Kukùdimuka kutàngila ku cinyi, kùdi Mwanèètù Branham anyi? Wèwè, udi mufwanyine kwikala mukùtākàne wèwè mwenze cintu bu nàнку awu. Kukùdimuka kutàngila kùdi Kilistò, ne Yèyè udi Dìyì! Kudimukila kùdi Kilistò!

¹³³ Umuka ku twitabàayi! Alukila mu...Kí mbwalu to, udi mufwanyine kwikala mubange twitabàayi webè, kukaadi bidimu nkama yìtaanu, mùdì ànu...Aci kacýèna ne musinga nànsha mukèsè ku mèsù kwà Nzambì to. Basàdoka ne Bàfaalesa abu bààkabanga ntanta mule kumpàla kwèbè, ne bààkapiìshiihwa.

¹³⁴ Kaa, udi ukeba kuteeka cileeeji cyèbè cyà Nyumà Mwímpè pa byenzedi bishiilèshiiàngane. Mémè ndi ngiitabuujà dimwèneshiibwa dyà Nyumà Mwímpè. Cìdì cyènza cinyi? Beena Mpenta bàdi bàmba ne: “Dyakula dyà mu myakulu’s ki cileeeji cyà mbangilu cyà Nyumà Mwímpè.” Nkaadiku mumòne baloji bakàji ne baloji balùmè bààkula mu myakulu. Nkaadi mubàmòne bààkula mu myakulu ne banwîna mashi mu kabalubalu kàà mutù wà muntu, ne bàmba ciprofeta kàdi bavila ne bwà cintu pàaci ne n’Nzambì kacituku to. Nkaadikù muyè mu bitùùdilu byà baloji mudibo batèèka kedyò pa mèèsà ne bamufikisha ku ditùmpika uya muulu walukila, ne ufùnda mu myakulu myenyi ne uyandamuna. Ncyà bushùwà. Aci kacýèna ne cintu nànsha cimwè cyà...Nànsha nàнку, ndi ngiitabuujà ne Nzambì ùtu wakula mu myakulu myenyi ku bantu Bèndè. Kadi nwènù nudi nutàmba kushindameena pòpò apu ne: “Mbwà cinyi bìdì bikèngela ne kwikalè mwandamunyi? Mbwà cinyi bivwa bikèngela kwikalaci mukenji bwà èkèleeziyà?”

¹³⁵ Pashiishe nwènù bantu bakwàbò, nudi nwamba ne: “Mamuma a Nyumà, ke mutùdì tumanya. Dinanga, disànkà, ke mutùdì bapete cileeeji.” Mmwòmò anyi? Dìbà adi Science Chrétienne s’ùdi unufinyina bònsò panshi. Bàdi bàdìbidija naaci bikolè kunùtàmba nwènù bònsò beena Mpenta, ba-Méthodistes, ne ba-Baptistes, basangisha pàmwè.

¹³⁶ Tangilàayi numòne cìdì cyènzeka. Lekelaayi nnuleeje mamuma à Nyumà, bwà numòne ní nudiku mwà kwakula kàbìdì bwà bwalu abu. Twangatàayi Yesù. Nzambì amfwileku luse bwà mèyi angàmbà àà; mémè nèngànji kuMukoma nyimà bwà katancì kakesè, bwà kunùleeja ne, angataayi nsangilu

wa bantu ewu mwaba ewu, ne nsangilu wa bantu ewu mu mapingaja emu. Nêngãmbè. . .

137 “Bakalenge, kudi Nsongãàlùme mu nyungulukilu emu, Dìna nè Yesù wa mu Nazàlèètà, kanuMulondiku nànsha! Uvwa dyàmbedi. . . Cìdi Bible wetù ewu utùlongesha ncinyi? Nzambi ùdi dinanga. Nganyi wa nzananza uvwa neebè pawàkalediibwa? Nsacerdòsè webè wa kale, wa musàngeelu awu. Ncyà bushùwà. Nganyi wakalwa kùdi paùvwa mu lutátu, kuyi nànsha dyèyà, ne kukusombesha ndambu wa mfranga? Nsacerdòsè webè wa kale, wa musàngeelu awu. Menemene. Nganyi wákakwela dibòkò dyèndè ku nshingu ne ku nshingu wa mamwèbè, panùkààvwa nwamba kushiyangana, ne kukusambidila ne kukwaluja kùdi Nzambi? Nsacerdòsè webè wa kale, wa musàngeelu awu awu. Nganyi wakiimana ku luseke lwèbè, paùvwa wèwè ne mutumba wèbè mu makokyanganyi, ne kunwaluja pàmwè mu bwobùmwè awu? S’nsacerdòsè webè wa kale, wa musàngeelu awu. S’ncyà bushùwà. Nganyi mwine’s, wàmba mèyi à ndekeelu pa wèwè ku ditùkù adi? Nganyi mwine awu? S’bàdi bakushiya mwaba awu ubola; kàdi nsacerdòsè webè wa kale, wa musàngeelu awu ùdi ùlwa ùkubènesha, ne ukutuma pàmwè ne Dìyi dyà Nzambi. S’nsacerdòsè webè wa kale, wa musàngeelu awu!

138 “Kadi bishi bwà Mulumyana ewu udibo babiikila ne n’Yesù wa mu Nazàlèètà ewu, dìbà adi, wamònu’s, m’Mupatukile mu cilongelu kaayi? Byàkakèngela bwà nsacerdòsè webè wa kale, wa musàngeelu awu kudifilaye, matùkù èndè ònsò à mwoyi. Kakwèndè mulùme uvwa mwakwidi. Tatwèndè wa tatwèndè wa tatwèndè wa tatwèndè wa kakwèndè mulùme uvwa mwakwidi. Wàkafila cyèndè cikondo cyònsò nkòong mu bulongolodi emu. Mmulongeshiibwe ku Dìyi; mmumanye cidìye wàmba aci.”

139 Mpindyewu tudi twakula bwà mamuma à Nyumà: musàngeelu, dinanga, disànkà, ditalala, dyumvwa, mwoyi mule, lutuulu, nwamònu’s, mamuma à Nyumà.

140 “Ambaku tumòne bwà mwine Yesù ewu, mMufumine penyi? Katùtùkù banji kuumvwaku mununganyi wà ne mMupatukileku ne mmu cilongelu kaayi to. Wèndè wònsò ùdi ànu wà kuteeta kusunsula bilongelu bitùkààdi biibàkè ebi’s.” Kakùyì mamuma à Nyumà mwab’awu to, mmwòmò anyi?

141 “CyàkenzàYe ncinyi kuntu kwàka kùvwa bangèndààmùshìngà bakwate ne byà luse abu, ne beena kantu-ku-byanza abu ne cyà. . . Bòbò, bòbò kabatu ne bayààkumuna mikòòkò, nànkù bòbò—bòbò mbenze kaacikumbi kakesè pambelu apu bwà muntu wàmòna mwà kutwàlamù mùkòòkò. Mwena kantu-ku-byanza mukwate ne byà luse awu, yèyè—yèyè mmuswe kulambula mùkòòkò, bwalu mushìngà wà Nzambi. Udi ùlwa ne mù—mùkòòkò, bwà kusumbisha mwena kantu-ku-

byanza, bwà wamòna mwà kulambula bwà musùùkà wèndè. Cyàkenza Yesù wenù wa ku Nazalèètà ewu ncinyi's? Kuntunkola mèèsà èndè; kwangata ndambu wa biseba e kubilukakaja, kwela bakwidi abu mfimbu kubapatula; ne kwamba mùdì nsacerdòsè webè wa kale, wa musàngeelu awu, 'nyòka mu mashindè; mwena lubombo'!"

¹⁴² Mpindyewu nwènù nudi nubiikila aci ne mmamuma à Nyumà amba's? Nànsha kakesè. Dìbà adi mamuma ènù miine à Nyumà awu adi akashààdila penyi? Ànu munùdì kàbìdì nwela meeji ku dyumvwilangana dyà luse, ne Yèyè kupicila munkaci mwà musumbà wà bantu amu, mintùtù myadija, mpofo, bikalaba, beena ntátu, beena bidimba byuminyine, bilemenda, ne kacya kàyikù ondopa nànsha umwe wa kùdìbo to; mùle téntè ne dyumvwilangana dyà luse's. Bantu bàà meeji à musunya kabààkuCimanyaku nànsha. Maasèminèrè kaátu aCilongesha to. Ndibuulula. Bushùwà's. Mamuma à Nyumà adi ashààdila apu's, kî mmwòmò to? Baakwidi abu bavwa ne mamuma à Nyumà misangu dikumi.

¹⁴³ Mmunyi mùdì mufwànyine kumanya cìdì cyà bushùwà? Dimwèneshiibwa dyà Dìyì dyakula dyà Nzambi diikale dimwèneshiibwe, Bukènkè bwà dìbà adi. Cyà bushùwà's. Ki cileeeji cyà Nyumà Mwimpè ncyòci aci, kwitabuuja Dìyì dyà Nzambi padìDi dimwèneshiibwè. Yèyè uvwa Dìyì, dimwèneshiibwe. Ki bàmwè kuDìvilabo, kuDisekabo, kuMwelulwilabo ne kuMubiikilabo ne—ne mmwena lubùku, nyumà kampànda mubi; kùdì cileeeji, cyà dyakula dyà mu myakulu, kùdì cileeeji cyà mamuma. Cileeeji cimwèpele cìdiku, mpàdì muntu witabuuja Dìyì difunda. PadìDi dishìndikiibwè, wèndela mu Bukènkè bwàDì. Yesù uvwa Bukènkè bwà dìbà adi bwalu Yèyè nguwwa Dìyì dilaya dyà dìbà adi, ne ùteeta bwà kubambila nànkù, kadi bàvwa batàmbe—batambe kwikala mu mîdimà bwà kuDyumvwa. Ki mudibi kàbìdì, leelù ewu, patùdì twakulangana apa.

¹⁴⁴ Mpindyewu bifukiibwa byà cikondo, ki citùdì's. Lambula njila yèbè kudiYe, nènku Yèyè neenze ne matùkù àcilwalwà ikale mîmpè, bwalu tudi tuMumòna ànu mudiYe mu Dìyì amu.

¹⁴⁵ Nwènù's nukàadi baMumòne ushindika Dìyì dilaya dyà leelù. Nudi nucimòna mu bimanyinu mu ngondo. Nudi nucimòna mu maèkèleeziyà. Vùlukàayi.

¹⁴⁶ "Wèwè wàmbi ne: 'mu èkèleeziyà,' aci cìdì ne bwalu kaayi ne èkèleeziyà?"

¹⁴⁷ Indìlaayi kakesè. Ngondo ùdì ùleeja èkèleeziyà. Yelusàlèma s'ki cimenga cyà èkèleeziyà citàmbe kumanyika cyà kale ne kalèlè pa buloba. Melekisedekè mmufùmìne ku cimenga aci; Mfùmù wa Salèma, Mfùmù wa ditalala, Mfùmù wa Yelusàlèma. Ncyà bushùwà, cimenga cyà citambè kwikala cyà kale pa buloba. Ne ciine aci civwa nngondo, bu mwaba wàkatèekiibwa

mikenji, kadi ki divwala dyà mîdimà ya bàà Bisàmbà byà bendè dilwalwà kucibwikila edi. Yèyè kwamba ne: “È—èkèleeziyà’s neàdyatakajè bimanu byà Yelusàlèmà too ne pààkajikà cipungu cyà bàà Bisàmbà byà bendè.” Kadi’s ki yèyè ewu. Twètù’s tudi ne mwoyi ànu mwômô amu. Ûdi munkaci mwà kwalukila buludi, cyà bushùwà menemene ànu mùdi dìnà dyànyì ne ng’William Branham amu. Èyowà’s, mukalenge, tudi mwà kucimòna. Yèyè mmubwikila kùdi mundidimbì, mudyànjila kuleeja mu mundidimbì, mudyànjila kwamba; ùbiikila Basungula bwa kupàtukabù. Bavwa bàbaabacila ànu mu mîdimà, bakwàbò bààbò, padibo benda baya apu. Èyo.

148 Mpindyewu tudi tumòna Dîyi Dyèndè dishindika. Tudi twitabuuja. Nàнку awu pìikalaYè mushindika Dîyi dyà leelù, cìdiDi, cìndi mwà kuditàcishila bwà cìdi cidimu citwala ncinyi’s? Cìndi mwà kuditacishila bwà cidimu cilwalwà ncinyi’s? Cìndi nditacishila ní ndi ne mwoyi leelù anyi ndi mfwa leelù ewu ncinyi? Dîyi dyònsò dyàkalayaYe nedishindikiibwè, ku dimwè ku dimwè! PìikalaYè ne bukolè bwà kucyènza leelù ewu, paanyimà pàà mumane kucilaya kukaadi bidimu binunu bibidi; pìikalaci ne mbidimu binunyu lukàmà, leelù ewu, Yesù neàpingane pa buloba mu mubidi ùdi ùmweneke, bwà Èkèleeziyà kampànda, Mupikula awu—awu, Mukàjì-musela, neaMupatule pambelu apa. Nànsha cinyi mwà kulwa, anyi kuya, myòdele, bamba ne “tungunuka,” ne bantu bàdi mwà kwendela mu ndondo wa mîdimà ya menemene eyi ne kwitabuuja cintu kanà cyònsò cidibo baswè kwitabuuja aci, kadi bwà Yesù Kilistò neàpingane cyàkàbidi. Ndi ne dyeyemena kudiYe bwà matukù àcilwalwà, dîbà adi. “Mukalenge Nzambì, ncyèna mumanye ne maalaba mmulame cinyi to, kadi ndi mumanye ne Wèwè ngudi mulame maalaba.”

149 Dîyi Dyèndè didi ànu mùdi dinwàngana dinènè dyà mijiki. Mbanganyi bàà ku nwènù bàkàadiku bumvwe dinwàngana dyà mijiki? Èè, bantu bònsò bakaadi bumvwe. Mpindyewu vùlukaàyi ne, dinwàngana dyà mijiki mpàdi mùjiki munkaci mwà kwimbiibwa mu dinaya kampànda. Ngeela meeji ne ndi mucyàmbe mu cyòci, dinwàngana dyà mijiki. “Peetelo ne Mbwa wa diitu,” nudi bavùluke aci, bwalu bulonda bwà kale bùvwàbo ne ciibidilu cyà...Nkaadiku muumvwe cyòci aci, mutùbo bangata ngoma ne bàdidisha tu—tunyuunyi tukesè twà mbonkòdi twà diitu atu, ne Peetelo upatuka, ne dikungula dyà mbwa wa diitu, ne didila dyà mpungi; dinwàngana dyà mijiki.

150 Mpindyewu, wèwè kuyi umvwa dinwàngana dyà mijiki, mmutooyi wàbùngi pàtupù bwebè wèwè, wèwè kuyi udyumvwa to. Bikèngela umvwe ne ncinyi. Ncyenza cyònsò kudi bimanyinu ne dinyungakana, kadi didi dipatula dinaya kampànda mu dinwàngana dyà mijiki adi. Mpindyewu, tudi tumòna ne, muntu umwèpele udi umvwa dinwàngana dyà mijiki mmusàki wa musambu ne aba bàdi ne dijinga dyà kudimanya, mbamanye

nshintulukilu yàdi, mbamanye cìdi cyènzeka.

¹⁵¹ Musàki wa musambu mmumanye dinyungakana dyònsò, kuumukila ànu ku ndekeelu too ne ku mbangilu, kuumukila ku mbangilu too ne ku ndekeelu. Nuvwaku bamanye aci anyi? Ewu wàkaufùnda awu, ùdi ùsàka eci nùnkù, yèyè mmumanye ndungilu yònsò. Pìikalayè mumanye ndungilu ne ndungilu yònsò, ki mùdi pèndè mulombodi ne cyà kwenza, bwa kuwùludika. Mpindyewu mmunyi muwàkonyangajila twitabàayi webè awu mu ciine aci? Dipangila dimwèpele dikesè dyà dikombo adi, cimanyinu aci, dipangila ànu dimwèpele dyà cimanyinu ku ndungilu awu, ndifwànyine kwenzeja musumbà mujima wa bimbi cyà patupu, kunyangisha dinwàngana dijima dyà mùjiki. Mpindyewu s'nudi bamanye ne aci ncilelèlà. Bikèngela musàki wa musambu ne muludiki biikale mu nyumà umwe.

¹⁵² Ki bwà cinyi mwambi ne Dìyi dyà Nzambì, Dinwàngana dinènè dyà mìjiki dyà Nzambì didiYe munkaci mwà kwimba kacya ànu ku kabundubundu kàà bikondo; mwambi, ku Dìyi, kabyèna bikèngela àtangila apa àmba ne: “Ngeela meeji ne bivwa bikèngela eci ciikale; bivwa bikèngela nwènù kuCyenza mùshindù *kampànda* ewu.” Bikèngela alonde mùshindù ùdi kabèji kàà Mùjiki kàmba bwà kucyàngata amu. Mùshindù awu ki ùdi ùkengela bwà Èvànjeeliyò kuyiishiibwayè, mùshindù ùdi Dìyi dyàmba bwà kuMwangata. Nudi bamanye's, wèwè mwà kwelaMu twitabàayi kampànda, apu's cintu cyònsò nkòong ncinyanguke. Bidi bikèngela bwà kwenzaci dinaya adi ànu mu dyòdi menemene.

¹⁵³ Muludiki ùdi ne cyà kulonda mùdi musàki wa musambu mwambe, kutuuta mikùmu ànu menemene nànkù, yà mùjiki awu. Mpindyewu tangilàayi, byònsò mbyenzà ku bimanyinu, ne bidi bikèngela ciikàle cimanyinu cyà mùshindù mujaalame, bwà kupatula mwadi wà mùshindù mujaalame.

¹⁵⁴ Pòlò wàkamba ne: “Pìikala mpungi upatula mwadi mulubidile, wadilongolola ku mvità nganyi?”

¹⁵⁵ Mpindyewu udi umòna Musàki wa musambu awu, Nzambì, Yèyè wàkafùnda Bible awu, cìdi ànu cyònsò dibuulula dyà Yesù Kilistò. Ùvwa mumanye dishintuluka dyà cikondo. Nènku muntu awu, mu—muludiki udi ubaludika awu, cimanyinu cyà cikondo, bikèngela kupetanganaci ànu menemene ne bimanyinu byà Bible. Alèluuyàh! Ekelekèle, ekelekèle, ekelekèle, ekelekèle, ekelekèle!

¹⁵⁶ Kaa, mwanèètù wa balùme, mwanèètù wa bakàji, mbwalu kaayi ebu ne bàà pa buloba's? Ndi mupàle bwà cinyi? Kudi katanyi mwaba kampànda. Dinwàngana dyà mìjiki kadyena mu dyumvwangana dyà menemene ne dibeji dyà Mùjiki to! Bàdi munkaci mwà kwenza twitabàayi yà èkèleeziyà ne bikwàbo byònsò, padibi ne Dìyi ndidi ne cyà kuyiishiibwa, bwà

kumweshiibwadi. Cintu kampànda cyà cipampalamuke mu baludiki abu, dîbà adi cisumbu cyònsò cyà bimbi bàà misambu aci cìdi mu cibwejàkàjì, ne ki mbamanye cyà dyenza to. Bònsò bàdi ànu benza maalu a lukutukutu ne: “Cìdi cyenzeke ncinyi? *Eci* ncifwanyine kwenza cinyi? Ncinyi, *eci* necyenzeke bishi? *Eci*, aci ncyenzeke bishi?” Ki mbamanye cyà dyenza mpindyewu to. Cidimwanga, bwalu ki ncibwelaku mu dyumvwangana ne Dîyì adi to. Ki lutàtu lutudi naalu ndwòlò alu, ne citùdi tubiikila ne, ditabuluja dyà ditùkù dyà ndekeelu. Ki lutàtu ludi naalu mukenji wètù wa beena Mpenta ndwòlò alu. Tudi bapatuke mu cikèmu cyà Bible, kuya ne kadyenza bulongolodi ànu mwakenzabo kale wàwa. Yèyè kupambuka cikèmu aci.

¹⁵⁷ Nzambi, wâfwakù luse. Mvwa’ a kujingaku kwikala ne mèyi àdiku mwà kuCipwekesha mu ndondo, ànu bu ne, mvwaku mwa kukangula ne kuCipongololamu.

¹⁵⁸ Kwenaku mwà kumòna, wèwè mwanèètù wa balùme, mwanèètù wa bakàjì ne, bikèngela ciikale mu dyumvwangana anyi? Muludiki ùdi ne cyà kupetangana ne Dîyì. PadiDi dyamba cintu kampànda, kwambi wèwè cintu cishùlàngàne to; nebìfile cimanyinu cyà mashimi, dîbà adi cintu cyònsò mu kaabujimà cìdi cipatuka mu cyoona. Ncyà bushùwà. Dîyì dyà Nzambi ndyumvwilangana dyà luse dinènè, anyi, dinwàngana dyà mîjiki’s we. Mfwilaayiku luse. Udi ne cyà kubanga mwàkenzaYe amu, mu Mùjiki. Udi ne cyà kubanga Nendè. Mònaayi, bwelaayi mu cyoona Aci.

¹⁵⁹ Wèwè udi wamba ne: “Èè, mèmè’s nkaadi mukashàale wa mu èkèleeziyà.” Aci kî ncyoona to. “Ndi mwenze cikampànda.” Aci kî ncyoona to. “Ndi mubànda ku cyoshelu ne mèmè—mèmè kwamba ne: ‘Ndi ngiitabuuja ne Yesù Kilistò m’Mwànà wa Nzambi.’” Sàtaanà’s utu wenza cintu cimwècimwè aci. Aci kî ncyoona to. Nwamònu’s, udi mupatuke mu dilondangana dyà cyoona. Cyàkenzeka ncinyi? Pàmwàpa muludiki kampànda mmukwambile ne: “Labùlàngana ku cyanza ufunde dîna dyèbè mu mukànda; shàala wa mu kasumbù kèètù, mu bulongolodi bwètù.” Nudi bònsò pambelu pàà cyoona’s!

¹⁶⁰ Dîbà adi pàabangà cintu cilelèlè kwenzeka kaaba aka munkaci mwà musumbà mukesè, nenwàmbè ne: “Èè, kadi bishi bwa *Cyàcyà*, bàdi pambelu pàà dyumvwangana.” Alukilaayi ku Dîyì bwà numòne ne nganyi udi pambelu pàà dyumvwangana. Numòna cìdi Nzambi mulaye. Numòna civwa Musàki wa musambu mwambe pa Bwalu abu.

¹⁶¹ Nwamònu’s, nudi ne bantu bònsò mu bateeleji bèènù. Ki bwà cinyi bàà pa buloba bàdi bakenzakana’s. Pavwabi bikèngela bwà kutangilabo èkèleeziyà bu mùtootò wà ùbalakana, wà ùkenka, Bukènkè budi butèekiibwe pa kakùna, bùdi muntu kàyi mwà kutamba ku dikenka, Bùdi muntu kàyi mwà kupiisha to.

162 Kadi, leelù ewu, ncintu cyà kusekabo kùdi bàà pa buloba, mbwalu baludiki mbacyumushe mu dyumvwangana ne Musàki wa musambu. Nudi bumvwe cîndì muswe kwamba aci anyi? Bàdi batuuta bintu bidì kabìyìMu to. Bimbi bàà mùjiki bàdi ne lutàtu lwà kumanya cyà dyenza mpindyewu; èkèleeziyà, badi bônso mu cibwejàkàji. Tudi bàkula pa cintakanyi cyónso aci, bidimu byónso ebi, ne tucìpiisha, kadi mpindyewu munkaci mwà kudìswikamu. Kaa, kudi cintu cipampàlamuke mwaba kampànda.

163 Mònaayi, nudi ne cyà kubanga mu Mùjiki mwàkenzaYe amu, kubwela mu cyoona Cyàwù, kubwela mu Dìyì dilaya. Kumona mwàkacyènzaYe ku cibangidilu, kumona mwàkacyènzaYe mu cikondo cyàpakaci, kumona mùshindù udiYe ucyènza mpindyewu, misangu yónso anu mùshindù ùmwèùmwe awu.

164 Tangilàayi muludiki awu, mùshindù udiye ùcyènza. Yèyè kàyi ùcyènza to, yèyè ùnùfunkwina ku bulongolodi kampànda; kakutuku kwanji kwikala muludiki ukààdiku mwenze aci to. Muludiki uvwa misangu yónso ànu ùkufunkwina ku Dìyì. Baprofeta bàà kale, bàakafunkuna ku Dìyì. Bàvwa Dìyì. Bàvwa ne nsòmbelu wa Dìyì. Nènku cyàkenza cinyi? Cyàkamwènèsha Nzambì. Aci cyàkatwàla Dìyì difùnda bwà ditùkù adi ku mwoyi, bwalu Dyòdi dyàkalwa kùdibo. Dyàkabàbuuludiibwa. Ke civwà lwàbo Lubwebwe. Àlèluuyàh!

165 Yesù Kilistò, Dìyì dyà Nzambì, ki Lubwebwe lwètù. “Pa lubwebwe elu Nèngìibakilèpu Èkèleeziyà Wanyì,” Dìyì dibuulula dyà Nzambì. Shalom, kùdi mwena kwitabuujja mulelèlà. Ditalala’s wè! Tukaadi ku cikondo cyà nshìikidilu. “Pa Lubwebwe elu Nèngìibakilèpu Èkèleeziyà Wanyì,” dibuulula dyà Dìyì.

166 Ewu wamba ne: “Èè, Wèwè’s udi muntu munènè. Udi bu Mòsà. Udi muntu munènè. Udi bu . . .” Ki ng’aci to.

Kadi dibuulula ndyambe ne: “Wèwè udi Mwànà wa Nzambì.”

167 Yèyè ne: “Kì mmusunya ne mashi bìdi bikubuulwileCi to, kàdi n’Taatu Wanyì udi mu Dyulu. Pa Bulelèlà bubuulula ebu, Nèngìibakilèpu Èkèleeziyà Wanyì.”

168 Ncinyi ciine aci? Yèyè udi Dìyì. “Ku cibangidilu kwàkadi Dìyì, ne Dìyì dyàkadi ne Nzambì, ne Dìyì dyàkadi Nzambì,” ne Dìyì dicidi ànu Nzambì. Ànu Yèyè, umwèùmwe awu leelù ewu, ùDimwènèsha ànu muvwaYe amu; Mòsà ne Eliyà, ànu nànkù, ne Yesù, ne Nzambì umwèùmwe awu leelù, ciMuvwija “Yesù Kilistò umwèùmwe awu makèlèlèlà, leelù, too ne kashidi,” Ebelu 13:8. Nwamònu’s, kabàvwakù bakufunkwine ku kasumbu kampànda to. Bàvwa bakufunkwine Muntu, bakufunkwine ku Dìyì, Nzambì.

“Ndi mbangila penyi, Mwanèètù Branham?”

169 Ku Nkurusè, bangila Nendè ku Nkurusè. “Nyingala, itabùuja Dîyi,” ki cidì Bible mwambe. Pashiishe londela mu cyoona cyà Dîyi dîdi dishaale adi.

Wêwè udi wamba ne: “Èè, nêngênzè cinyi?”

170 Tungunuka wêwè ànu ne kulonda cyoona cyà Dîyi adi. Piikalabi ne “nyingalalaayi” ki cintu cyà kumpàla, mu kujingulula, enza cyôci aci, ki cidya cyèbè cyà kumpàla ncyôci aci. Teeka cidya cyèbè cidì cilondà padi Dîyi dyamba. Tungunuka, ànu nàнку, mutungunuke ne kwenda Nendè.

171 Kunyangakajiku cyoona to wêwè mwikàle citùpà cyà Dinwàngana dyà mijiki cyà Nzambi. Kunyangakajiku cyoona cyà Dîyi to. Kukonkikù ne: “Èè, bwà cinyi? *Cikampànda* ncyenzèke bwà cinyi? Mwua mucitèète, Mwanètù Branham, kadi, pààkangiipatàbo apu, udi mumanye cîndi mwenze anyi? Mémè ntu mwambe ànu kufwà ne nzala.” Kwebeji ne mbwà cinyi to. Yèyè mmumanye cyoona, mùshindù ùdici ne cyà kwenza, èyowà’s, mukalenge, bwalu Bààkafùnda. Yèyè mmumanye byònsò pa Cyôci aci. Yèyè mmumanye cyoona aci. Kwèbejikù ne mbwà cinyi to. Û’Citàbùùjè!

172 Nzambi mmutungùnùke mu cikondo cyà maalu-malonda, ne Dîyi Dyèndè dilaya, mu cikondo ne cikondo cyònsò, ne kacya katuku mwanji kupangila (bwà kunyangakaja) cyoona aci, ku Bukolè bwà Nzambi, pààkafikaBu kùdi cisàmbà cisungula ne cishindika to. Cyoona cyà Dîyi Dyèndè mu matùkù à Noa, cyoona cyà Dîyi Dyèndè mu matùkù à Noa, mu matùkù à Mòsà, mu matùkù à Eliyà, mu matùkù à Yone, mu matùkù à Davidi, mu matùkù à Yesù, ànu nàнку, Yèyè mmulame cyoona cyà Dîyi, wenda uya ànu nàнку, kacya katuku muCinyangakaje to. Yèyè wàkatungunuka ànu nàнку mu maalu-malonda. Ne Diminu disungula, dyàkaCimòna ne kuCìitabuuja adi, kudibwinkadi buludi mu cyoona aci pàmwè naaDi.

173 Bakwàbo bàdi bàmba ne: “Èè, kadi èkèleeziyà ùdi wàmba...” Aci kaciyèna ne cyà dyenza naaCi to. Kwèna mulediibwe bwà kwenza nàнку to.

174 Udi mulediibwe mu Dîyi, bwalu udi mulediibwe mu Kilistò. Kilistò n’Dîyi, èyowà’s, mukalenge, cintu ne cintu mu cyàci cikondo.

175 Wêwè udi wamba ne: “Èè, s’nênkwambilè, Mwanètù Branham, mémè ncyèna mwà kutangila kumpàla to.”

176 Dìbà adi tàngila kuulu. Nzambi mmulaye, wêwè mwà kubànduluka, kuMumòna; shalom, ditalala, ditalala dyà Nzambi dîdi dikwikishisha.

177 Wêwè udi wamba ne: “Kadi mbwà cinyi bakwàbo bàdi bangelulwila, Mwanètù Branham? Udi mumanye’s, bakwàbo batu bangelulwila, bàmba ne mémè—mémè ndi ne ‘nsuki mile,’

ndi ‘wa cyena kale,’” bwà bakàji. Bwa muntu mulùme ne: “Bwalu mèmè ndi ngiitabuuja Bible ne: ‘Kwèna kàbìdì neetu mu bwobùmèwè to. Katwèna mwà kukwitaba to bwalu udi—udi wèwè witabuuja *bikampànda ne bikansanga.*’”

¹⁷⁸ Kadi pèèbè mumanye ne bìdì menemene ànu mùdì Dìyì difùndìibwe amu. Nzambì mmwenzejìibwe kùdì, bwà kutwà Cyòcì aci nyama ku mikòlò. Neyà bushùwà ne m’Mwenzejìibwe kùdì. Abi kabìkutacishi to, ne mbwà cinyi bàdì beèlulwila. Nzambì ùdì Nzambì wa mukàwù. Vùlukààyì ne, kukenga bwà bwalu bwà Dìyì Dyèndè mbìsaamà byà dikola byà ngàsà Wendè. Paùdì ukenga bwà bwalu bwà Dìyì Dyèndè, bìdì ànu mbìsaamà byà dikola.

¹⁷⁹ Nudi bamanye mudi mwànà mutekète, wa bidimu dikumi, dikumi ne bìbìdì, upeta bisaamà. Ùdì ùbwela, wàmba ne: “Maman, mabòko àànyì adi ansaama ne mikòlo yànyì yìdì yisaama,” ne bikwàbo. Bìdì ànu mbìsaamà byà dikola’s. Bìdì bìleeja ne ùdiku ne vitamines mîmpè. Ùdì munkacì mwà kukola.

¹⁸⁰ Nènku padi muntu ubanga kukwelulwila, wamba ne: “Mwànà wa bakàjì ewu’s ngwa cyena kale. Tangilaayi mulùme wawa, ùdì. . . Kaa, ndi nkwambila, s’ùvwa ne ciibidilu cyà kwikala. . .” Èyo, wavùluka ànu ne, mbìsaamà byà dikola. Aci ndikengeshiibwa dìdì dîmpè bwèbè wèwè. Mbìsaamà byà dikola.

¹⁸¹ Kaa, èyowà’s, Yèyè ùtu wànyishila nkùrusè ne masangu a njila ne ndungilu. Ùtu wenza aci ànu misangu yònsò, bwà kutupwangaja bwà mudimu Wèndè. Yèyè ùtu wànyishila bintu abi bwà kwenzekabi. Kanwenaayiku mwà kuumvwa aci anyi? Yèyè udi wenza nàнку bwà Wàmòna mwà kukupwangaja bwà dibìikila dìdìYe mukubìikile. Ki bìsaamà byèbè byà dikola mbyòbì abi. Yèyè wàkenzà Danyèlè mùshindù awu, nudi bamanye’s.

¹⁸² Yèyè wakenza bânà bàà beena Ebèlu, mu cikùtù cyà kapyà. Cyàkenza cikùtù cyà kapyà ncinyi? Cikùtù cyà kapyà cyàkakosa ànu myonji yivwa mibàsweike ayi. Ki cyònsò cyàkenza cikùtù aci, ànu kwòsha kusùulula myonji.

¹⁸³ Misangu mikwàbo bitu bikèngela mateeta bwà kukosa myonji ya maalu à pa buloba kutùdì, kukupatula mu maalu à pa buloba. Mbifwànyine kwikala, bikèngela bwà kukupatula mu twitabàayi webè, dyàmbedi. Mbyenze bu muntu munkacì mwà kunwa tubalu ùfwa mu musulu amu, bikèngela ùmupatulè mu musulu amu kumpàla kwà wèwè kupatula musulu munda mwà muntu awu. Bìdì byàmba kupetangana ne mùshindù ùdì Nzambì ne cyà kwenza mìngà misangu. Banji bakwele pambelu, musangu kampànda, pashùshe bapatula maalu à buloba mu wèwè. Bikèngela bwà—bwà kukupatula mu maalu à pa buloba, dyàmbedi. Misangu mikwàbo bìsaamà byà dikola ebi mbitu byenza nàнку. Kaa, èyowà’s.

184 Nzambi ùtu wimana pa Dìyì dilaya bwà cidimu cyònsò cipyacyipya. Yèyè ùdi wimaPù, cidimu eci, bwà kuuja cidìYe mulayè bwà cidimu eci. Nànsha ciikàle cinyi, ndi muswè kwikala ànu munkacìnkaci menemene mwà diswa Dyèndè mu matùkù àcilwalwà, mwàkenzàbo amu.

185 Bu Abraham, pàakafikaye mu masangu èndè à njila awu, kavwa mumanye mwà kupita naabi to. Nzambi wàkamwambila ne: “Nènkupéèshè mwànà wa balùmè.” Bidimu makumi àbìdì ne bitaanu bulubulu uvwa ànu yèyè mwindile ciine aci. Ndekeelu wa byònsò mwànà awu kulwaye, pashiishe Nzambi kwamba ne: “Mpindyewu, ku mwànà ewu, Nènkuvwijè taatù wa matùnga àbùngì. Bànda nendè kuntu kwàka kadi umushipe. Bànda nendè kadi umushipe,” kushimbula cintu ciine civwaye mwindile bidimu makumi àbìdì ne bitaanu aci. “Bànda nendè umushebèyè.”

186 Abraham kàakatàcishiibwaku to. Kacyàkamutàcishaku to. Kwambulaye nkunyi ne kuyambikaye pa kampundu kakesè, ne kwangataye mwanèndè wa balùme awu. Kubàndayè nendè too ne ku lusongo lwà kakùna aku, bwà kumulambulayeku, bwalu Abraham ùvwa mumanye ne yèyè ùvwa mumupete bu mubiike ku bafwè; Matrice à Sarah òwò akaavwa mamane kufwà, yèyè ùvwa nkumba, pa nànkù kakùvwakù mùshindù to. Nènkù mwànà wa balùme awu... Ùkaavwa ne bidimu lukama, ne mukàjì ùkaavwa ne bidimu makumi citeema, pa nànkù wàkalwa ku Dìyì dilaya. Nzambi umwèumwè wàkenza mulayi awu, wàkamba ne: “Nènkuvwijè taatù wa bukwayatùnga,” paanyimà pàà bidimu makumi àbìdì ne bitaanu, ne mwikala ne bidimu lukama, yèyè ne mukàjèndè kupetabo mwànà awu. Piikalabi ne Nzambi wàkamwambila bwà kumulàmbulaye, Nzambi ùvwa ne bukolè bwà kumujuula. Amen.

187 Nzambi atumbe's wè, bânà bèètù. Ndi ndyumvwa bîmpè. Ngũmvù butendeleedi bwàmbwedi's wè. Pa nànkù mùshindu mwine ùndi ndyumvwa bîmpè's we! Ndi mumanye cintu cimwèpele eci ne, Yèyè udi ne bukolè bwà kumujuula cyàkàbìdì. Netwimanyinè pa Dìyì dyà Bukènkè dìdì kadiyi disambakaja dyà dîbà edi! Nzambi neàtùbiishè pàdì lukòngò elu lùlwa, bu Makènkè akenka bwà kulwisha lukòngò elu. Amen.

188 Kabyèna bikemesha to pàakambaYe ne: “Mukalenge-mukàjì wa ku Sud neàjuuke mu Cilumbulwidi, ne lukongo lwèndè, ne neàlupìishè; bwalu wàkalwa ufumina ku bitùpà byà kulekùlè byà buloba, bwà kuumvwa lungenyi lwà Solomo, ne, mònaayi, munène mutàmbe Solomo ùdi mwab'ewu.” Mùshindù mwine ùvwa mukalenge-mukàjì mukese awu, mupweke too ne kwînshì aku, mumpàngaanu, mumòne Bukènkè abu, ne mulwe wenda mu ntanta wa kilòmèètà yàbùngì mu cipeela amu, ngondo yisàtù pa kaameelu, bwà kuumvwa lungenyi lwà Solomo, ne bôbò bavwa biimane mwaba awu mene, ne Solomo bu cifwànyikijilu, cimfwànyi Cyèndè.

¹⁸⁹ Ne pashiishe kulwa ne kumòna Wesley, Luther, bakwàbo bônso abu, màngumba paanyimà pàapa, biikale cimfwanyi ne cifwanyikijilu cyà cidì munkaci mwà kwenzeka mpindyewu eci, kàdi biikale bendelaMu buludi. Kaa! Èyo.

¹⁹⁰ Bwalu, nènku cidimu cipyacipyà ncipàngadika kudi Nzambi, pàngadika wèwè ànu bwà kushàala mu Dìyì Dyèndè. Endela mwaba ùdi Dìyì dyamba bwà kwendela, patùkàadi tusemena mpindyewu pabwìpì ne dyoya apa, mwàkenza bakwàbo abo, Dimiinu disungula mu ditùkù dyàbo pàakamonabo Dìyì. Bàakenza cinyi? BààkendelaMu, piikalabi ne bavwa Dimiinu disungula mu bikondo bikwàbo, bwalu Yèyè udi Dìyì didi kadiyi dipangila adi. Mbanganyi bàdi biitabuuja ne Yesù Kilistò udi Dìyì? Kaa, ekelekèle!

¹⁹¹ Mvwa muumvwe ndongamu kampànda ditùkù adi, wa dingumba kampànda dyà bantu, Mukalenge H. M. S. Richards kwambaye ne yèyè nguvwa “mufunde mukàndà wà cidimu awu.” Ncyèna muswe kwikala mpanganangana ne muntu wa mùshindù awu to. Nànsha mudibi ne, ng’Adventiste du Septième jour, ncyèna mpetangana ne dilongesha dyà ba-Adventistes du Septième jour to, kàdi ncyà bushùwà ne mèmè ntu munange muntu awu. Kàdi ncyàkupetangana nendè ku mèyi to. Aci cidì mwà kwikala mukàndà wà H. M. S. Richards bwà cidimu cipyacipyà.

¹⁹² Kàdi wànyi Mukàndà ne wèbè Mukàndà, bwà cidimu cipyacipyà, m’Mukàndà wà cidimu cyà kale, Bible, Dìyì dyà Nzambi. Enza wèwè ànu ne Wikale ne mwoyi ku cidìWu mulaye bwà kwikadila ne mwoyi aci. Èyowà’s, mukalenge. Ne cidimu cyònsò cicilwalwa cidì cilwa eci, ne cidimu cyònsò cikàatùku eci, Yèyè ùdi Nzambi wa Cyendèlèlè mwikàle ne mwoyi ku Dìyì dyà Cyendèlèlè dyakambàYe adi, pàdi Bulelèlè bwònsò bwà mu Bible ne mulayi ónsò wà munda mwàWù mushindikìibwe, ànu muvwawu munda mwà bikondo byònsò.

¹⁹³ Mùshindù mwine wàkalaya Nzambi ne neÀbutule bàà pa buloba ku màyi, ne Wàkacishindikila kùdi Mòsà . . .anyi kùdi Noa.

¹⁹⁴ Wàkalaya ne Ùvwa mwà kutuma musungidi, ne kupatula Izàlèlèlè mu Èjiipitu; bavwa bashàalemu munda mwà bidimu nkama yinaayi. Wàkenza ànu aci menemene.

¹⁹⁵ Ne Wàkadicipa ne Ùvwa mwà kajuula Davidi, ne mùvwà Davidi mwà kwikala mwà—mwànà wa balùme; anyi Kilistò ùvwa mwà kwikala mwanèndè, ku Davidi kuvwa mwà kulwila Kilistò. Mùshindù wàkadicipàYe ne Neènzè cyòci aci; Ki cyàkenzaYe.

¹⁹⁶ Wàkalaya ne Ùvwa mwà kutuma Yone Mubàtiji, kumpàla kwà dilwa dyà Yesù Kilistò. Ki cyàkenzaYe.

Yèyè wàkalaya ne Ùvwa mwà kutuma Maasiyà. Ki cyàkenzaYe.

197 Wàkalaya ne buloba buvwa mwà kubwela mu musùmbà munènè wà malongolodi ne kwenza ndongolwelu kampànda, bukolè, bumanya bu nyama wa lwonji, ne ùvwa mwà kwikala kuntwaku musòmbe pa tukùna mwandamutekète. Byàkenzeka ànu nàнку menemene.

198 Mùshindù mwine uvwa èkèleeziyà mwà kubàkèngesha's, too ne ku lufù! Bààkenza ànu nàнку menemene.

199 Muvwabo mwà kupatuka mu dilongolola! Bààkenza ànu nàнку menemene. Mùshindù wàkalayàYe mu cikondo ne cikondo cyònsò ne necyenzeke!

200 Ne Wàkalaya bwà cikondo eci. Nènku's ki Yèyè ewu, leelù ewu, wenza ne Diyì adi diikale ne mwoyi, ànu mwàkenzaYe ku cibangidilu menemene amu. Cyà bushùwà's.

201 Nènku pàdi mulayi ònsò uujiibwa: “lufù luminyiibwe mu bucimunyi,” Yesù nealwe; ne wa ndekeelu mushindikiiibwe, dībà adi nekùlwe ditalala dyà Cyendèlèlè pa buloba, ne shalom wa Cyendèlèlè. Shalom wa Cyendèlèlè, ditalala, nebishaalè pa buloba.

202 Pààkalwa Yesù, Mfùmù wa Ditalala, bwà cinyi kakùvwa ditalala? Bwalu Diyì dyònsò kadyàkuula mu ditùkù Dyèndè adi to. Udi munkaci mwà kuDyùja leelù ewu. Kàdi piikala Diyì Dyèndè dilaya dyònsò, divwa meeji à Nzambi adi . . .

203 *Diyì* ditu “meeji mapatwila patòoke.” Nzambi, mu meeji Èndè, muDyelela meeji, ne kuDileejila patòoke ku baprofeta Bèndè, ne mpindyewu bikèngela Dyùlè. Nènku, padibi ne, Yèyè ukaavwa mudyanjile kutwambila maalu aa bwa katùlù kwenza cilema ne kutukina mu mîdimà to dībà adi, patùdi tucimòna munkaci mwà kuula.

204 Mpindyewu, Yèyè wàkalaya bwà kutuma Kilistò musangu mwibìdi. Ne dībà kanà dyònsò didiYe ùmutùmà adi, pàalwà Kilistò musangu mwibìdi, nekwikalè shalom wa Cyendèlèlè.

205 Tèèlejàayi, balunda bàanyi, patùdi tujikija apa. Vùlukàayi ne, Bible ke mpokolo wa lungenyi lwònsò. Kalwena lùfùmine kudi Mulongeshi, Ph.D., LL.D to. Lùdi lùfùmine ku Diyì dyà Nzambi.

206 Kuvwa ba-Docteurs mu Buzambi basòmbe mwaba awu, nkama ne nkama, ne Mwànà mukesè wa balùme wa bidimu dikumi ne bibìdi kubatwishaye pànshi, bwalu Yèyè ùvwa Diyì. Mwànà mukesè wa balùme awu kavwa ne kàlaasà kalonga nànsha kakesè to, kàdi Yèyè uvwa Diyì. Bwalu Yèyè nguvwa Bukènkè bwakula bwà ditùkù adi, Yèyè uvwa munkaci mwà kumwenesha Diyì adi. Diyì divwa munda Mwèndè. Bivwa ne cyà kwikala nàнку. Kabyèna bikemesha to pàvwà cìvwàYe wàmba cyènzeke, bwalu Yèyè ùvwa Diyì. Nudì bùmuvwe anyi? Bònsò bàdi bùmuvwe, bambe ne: “Amen.” [Disangisha didi dyàmba ne: “Amen.”—Muf.] Yèyè uvwa Diyì.

207 Vùlukààyì Bible, kî mmukàndà kampànda wà cidimu ùdi mufùnda kùdì muntu to. “Dìyì dyà muntu yònsò dìikale mashimi, kàdi Dyànyì Bulelèlà.”

208 Ne tusumbu twa ntèndeleeleu ne ntèndeleeleu, ne—ne bikwàbo, byònsò bidi ànu bicyompakajangana panùdì nubwejaMu musùmbà wa bantu. Kacya Nzambì kàtukù mwanji kukwata mudimu mu musùmbà bu nàнку to. Bu Yesù mwa kulwa leelù ewu, Yèyè mmufwànyine kutwà ku cyà ba-Méthodistes, cyà ba-Baptistes, cyà ba-Adventistes, Bantemu bàà Yèhowàh, beena Science Chrétienne, beena Mpenta, anyi ba-Presbytériens? To, mukalenge. Ncyà bushùwà ne kàakwenza nàнку to.

209 Bwalu mbwà muntu nkààya, wèwè ne Nzambì. Kakwenaku bantu bàbìdì bàmona mùshindù ùmwepele menemene, bònsò bàbìdì byà mwòmùmwè to; kakwenaku byàlà bibìdì bifwànàngane to. Nzambì ùtu ùkwàta mudimu ne muntu nkààya. Kàdi mmunyi mùdì umanya ne mmubinge anyi kî mmubinge? Nàнку ela dísù paanyimà umòne ní ùdi ne Dìyì. Yèyè mwikàle ne Dìyì, dībà adi Nzambì ùdi ùkwàta nendè mudimu; byòbì kàbiyi nàнку to, cintu kampànda cikwàbo ncìdì cikwàta nendè mudimu. Nwamònu anyi? Ncyà bushùwà.

210 Vùlukààyì ne, Bible ke mpokolo wa lungenyi lwònsò, ne mmulamè ditekemena dyònsò dyà matùkù àcilwalwà munda Mwèndè amu. Shalom, ditalala dyà Nzambì!

211 Bu bwalu bwàkalondabu musangu kampànda, bwà mwàna mukèsè wa balùmè wàkafwisha tatwèndè kàyi mwanji kufika bukolè bukumbane bwà kumònaye tatwèndè; ànu mwàna mukèsè wa mu dibòko pàakafwa tatwèndè apu. Dìngà ditùkù pàkaavwaye ne bidimu bitwe ku dikumi, anyi dikumi ne bibìdì. Ùvwa ne mwanààbò mukwàbò wa balùme, dyèndè John. Kuyaye kùdì mwanààbò wa balùme, kwambaye ne “Uh, John,” uvwa yèyè mukulwende ku bidimu byàbùngì, yèyè ne, “udi, udi mùvuluke papa anyi?”

Awu ne: “Èyowà’s.”

Yèyè ne: “Ùvwa bishi’s?”

212 Awu ne: “Èè, yèyè’s uvwa muntu mule, ne ùvwa muntu mwìmpè wa dikema. Ùvwa misangu yònsò ne musàngèelu kùdì maamù, ne ùvwa ne maalu mìmpè kù—kùndì, ne ùvwa ne maalu mìmpè kùdì bantu bònsò.”

Yèyè ne: “Èè, ki cyònsò cyùdì mumanye pa bìdì bimutangila anyi, John?”

213 Awu ne: “Èè, lekà nkwambilè’s.” Kwambayè ne: “Henry,” yèyè ne, “bantu bònsò bàdi bàmba ne mèmè—mèmè ntu mumufwàne.” Kwambayè kabìdì ne: “Bantu bònsò bàdi bàmba ne ndi ne ngiikàdilù bu yèyè.”

214 Yêyè ne: “Kaa, abi’s mbîmpè! Ki cîndi muswe kumanya ncyôci aci.” Yêyè ne: “Pândi nkumona, ndi mmòna papa wanyi.”

215 S’ki cyôci aci. Pàmònà bàà—bàà pa buloba Yesù Kilistò, neciikale mu wêwè, pàdi Dîyi didi difundiibwe bwa leelù ewu.

216 Mmwaba kaayi unùdi numòna Yesù mu Davidi? Mpààkamwêneshiibwà Dîyi munda mwèndè.

217 Mmunyi munùdi numòna Kilistò, Nzambi mu Eliyà, mu dikalu dyà mvità didi dibwela mu Dyulu adi, numòna Yesù mu Eliyà? Bwalu, Dîyi dyàkashindikiibwa.

218 Mmunyi munùdi nuCimòna mu Mòsà? Yesù uvwa mu Mòsà. Bible ngudi mwambe nànkù. Nwamònu’s, ncyà bushùwà, Yêyè uvwa cipuka civwà cilakuka kapyà civwà ne Mòsà mu cipèela aci.

219 Bantu nebàmanyè Yesù Kilistò bishi? Padibo, yêyè, ùMumòna munda mwèbè, pàdibo bamòna Yesù munda mwèbè amu. Bwalu, Yêyè wákamba ne: “Byenzedi bîndi Mémè ngenza nenùbyènzè pèènu. Nenwènzè binène bipite ebi, bwalu Nyaaya kudi Taatù Wanyi.” Ncyà bushùwà anyi? Ki mùdìbo, bàà pa buloba bamanya.

220 Kabiyi ne mbwalu mwena Mpenta Unitaire mmunènè kutamba mwena Mpenta Binitaire to, anyi Binitaire mmunènè mutambe Trinitaire to, anyi cyònsò cyùdi naaci aci; kabiyi ne mbwalu Méthodiste mmunènè kutàmba ba-Baptiste to; anyi ba-Baptistes bà ku Sud mbàdi bangata dikopo cidimu edi bwà èkéleeziyà yònsò—yònsò yà ba-Baptistes, bwà beena Mishòdnyì bònsò. Bàdi ne bidimba bipite búngì eci cidimu kutàmba ne nganyi yònsò wa ku bàdi bashààle abu, mündi nguumvwa, ku milubù. Aci kacyna cibashintululaku nànsha kakesè to. Nzambi kèna ùnumanyina ku búngì to. Bampangaanu batu banùpите ku búngì, díbà kanà dyònsò edi. Beena Kàtòlikè bakaadi banùpите nwènu bònsò. Ba-Mùzùlùmanyi’s mbabapite bònsò. Nwamònu anyi?

221 Wêwè udi mumanyike mpàdi Yesù Kilistò ne mwoyi munda mwèbè, ku Mwoyi Wèndè, ne Dîyi dilaya dyà ditùkù edi diikale diDileeja. Nwamònu anyi?

222 Mpindyewu Dîyi dimwèdimwè divwa dileeja mu Mòsà adi kadivwa mwà kwikala dileejùbwe mu Eliyà to, bwalu adi divwa nditùkù dikwàbo. Civwa cileejùbwe mu Noa kacivwa mwa kwikala mu Mòsà to, bwalu, nwamònu’s, Noa wàkiibaka bwàtù, Mòsà wàkalombola cisàmbà, ànu mwàkalayiibwaci menemene. Bukènkè bùmwebùmwe bùvwà buleejùbwe mu umwe, kabùvwu mu mukwàbo to, kàdi umwe wàkaakula bwà mukwàbo.

223 Dipungila Dipyadipyà dyònsò didi dyàkula bwà díbà edi. Yesù Kilistò ùdi wàkula bwà díbà edi. Nganyi awu, díbà adi, muntu kampànda anyi? N’Yesù Kilistò, Mwànà wa Nzambi,

umwenesha, uleeja Bukênkè pa Dìyì dyàkalayaYe bwà ditùkù edi adi.

224 Pàdi muntu ukumòna ne mwoyi bu Yèyè, pàdiye umòna ngiikadilu webè ne ngenzelu webè wa maalu bipetangane ne Dìyì menemene ànu muvwaYe amu, Dìyì dimweneshiibwe, dībà adi bantu nebàmòne Yesù Kilistò. Kabyàkukèngela bwà kukenzakanabo myaba mikwàbo yònsò, bamba ne: “Twitabàayi ewu udi ulongesha cinyi, cidi twitabàayi wàwa ulongesha ncinyi?” Bòbò nebàmanyè cidi Nzambi pàdibo bakumòna wèwè.

225 Shalom, ditalala dyà Nzambi diikale Bukênkè pambidi pèèbè! Nènku pàdi Dìyì dyà Nzambi dishindikìibwe mu cikondo eci, mu kaabujimà, ne nuDìmòna ne nuDìitabuujà, shalom kùdi!

226 Kungamanganà ne cidimu cipyaci pyà ne cyòci eci, Mutèèka mwàkambà Davidi ne: “NèmMutèèkè misangu yònsò kumpalà kwànyì. Bwalu Yèyè udi ku dyàbalùme dyànyì, ncyàkunyungishiibwaku nànsha.” Wèwè mukatwilangane ne lufù eci cidimu, bìdi bishiintulula cinyi? Nzambi mmulaye ne Yèyè neàkujuule. Njiwu yòyì mikushipe, bìdi bishiintulula cinyi? Udi ne Mwoyi wà Cyendèlèlè: “Nèmmujuulè ku matùkù a ndekeelu.” Amen. Ambaaku tùng ní ncinyi ní ncinyi cyenzeke? Nànsha ciikàle cinyi, cintu nànsha cimwè kacỳena mwà kutùtapulaku ne dinanga dyà Nzambi, didi mu Kilistò to. “Nzala, njiwu, musùnsù, nànsha ciikàle cinyi, kakwèna cintu cidi mwà kutùtapulaku ne dinanga dyà Nzambi, didi mu Kilistò nànsha.” Ne Yèyè udi Dìyì. Shalom!

227 Twinyikàayi mitù yètù. Mpindyewu bantu bònsò lamàayi mitù yènù miinyika bwà katanci kakesè. Ditalala dyà Nzambi!

228 “Yà mupimbu . . .” [Katùpà kàà mukàbà wà mèyì munda mutupù—Muf.] “Ànu mwàkadibi mu matùkù à Noa, mùvwàbo bàdya, bànwa, bàsèlangana, bàsèlesha,” Reno kampànda, Nevada, ne buloba bujima bwà mudilu mukunze abu, “ki mwikalabi kàbìdi ku dilwa dyà Mwànà wa muntu.”

229 “Ànu mwàkadibi ku Sodoma,” kwàkamweneshiibwa Nzambi mu Muntu wàkabiikilàbo kùdi Abraham ne Elohim awu, Udi udikùmbanyina mu byònsò awu; mwimane mwaba awu, ùdya munyìinyi, ùnwa mabèèlè, ne dyàmpà; ne mwikale mwà kwamba civwa Sarah wela meeji paanyimà pèndè, paanyimà Pèndè apu, mu ntenta awu. Wàkamba ne: “Aci necyàlukile cyàkàbìdi ku dilwa dyà Mwànà wa muntu.” “Katanci kakesè aka, bàà pa buloba kabàakuMmòna kàbìdi to; kàdi nwènù nenùMmòne, bwalu Nèngiikalè neenù, munda mwènù mene, too ne ku nshiikidilu kwà buloba.”

230 Beena Yuda munkaci mwà kwalukila ku buloba bwàbò. Bintu bìdi munkaci mwà kwenzeka, bìdi mu ditùkù edi ebi, mbifwànyine kumpangisha bwà kubanga kunwambila nànsha cyàbìbìdi cyà bìdi munkaci mwà kwenzeka, kàdi’s tуди babimòne’s. Ncinyi ciine aci? Dìyì dimwènèshiibwe.

231 Nudi nwela meeji ne cyàkenzà beena Ebèlu ncinyi pààkamònabo Dîyi dimwènèshìibwe, ne mulayi? Bààkadilongolola bwà kuumuka mu buloba abu.

232 Pawikala kuyi mudilongolole leelù ewu to, mulunda wanyi, bangà cidimu cipyacìpyà eci mùshindù mujaalame, ucitwadije ne cyanza cyèbè mu cyanza cyà Nzambi, Dîyi dyà Nzambi mu mwoyi wèbè, wamba ne: “Mukalenge Yesù, ncyèna mumanye ne ncitùpà kaayi cyà Dinwàngana dyà mùjiki edi cyÚdi muswe bwà mèmè kwimba to, kàdi pàfikila ndungilu awu bwà mèmè kukengeshiibwa, kusekiibwa, kwelulwidiibwa, ncidi ànu mushàale mwimane mu mùshindù wà ne Dinwàngana dyà mùjiki Dyèbè kadyàkùnyanguka bwànyi mèmè nànsha. Nènshaalè ànu ne Dîyi Dyèbè, nànsha Dyòdi diikale cinyi. Nènshaalè ànu mwaba awu. Nènku pàkokola lufù ku ciibi cyànyi, ki citùpà cyà Dinwàngana dyà mùjiki ncyòci aci. Ndi mumanye dîbà adi, ne, ànu bushùwà mùdi lufù lukokola ku ciibi cyànyi amu, dibiika dyà ku lufù nedikokola kumpàtula dimwè dyà ku matùkù aa, dyòdi pààdi, ne Wèwè neùnjuule cyàkàbìdi. Ncitùpà cyà Dinwàngana Dyèbè dyà mùjiki. Mukalenge, enzaku bwà ngiikale citùpà cyàdi leelù ewu, Udikù mwa kuswa nànkù anyi?”

233 Mbanganyi bàdi baswè kwenza mucipu awu, ne kwamba ne: “Kubangila ku cidimu cipyacìpyà eci, Mwanètù Branham, kubangila ku disangisha edi, mpindyewu mene, ndi mpindyewu ndaya Nzambi, bwà kwangata kaaba kàanyi, bwà ncipangiku bwà kushaala ne Dîyi Dyèndè dilaya to, ne kwikala ne mwoyi menemene ànu mùshindù ùvwaYe mucilaye, mu kalolo ne didipwekesha; bwà Nzambi angate nsòmbelu wanyi ne amutèèke mu Dinwàngana Dyèndè dinène dyà mùjiki adi, bwalu cisumbù cimwècimwè aci ncyàjuulaYe ku matùkù à ndekeelu. Ndi ngeela cyanza cyànyi muulu, Mwanètù Branham, kî nkùdi wèwè to, kàdi nkùdi Nzambi. Wamvùlukakù mu disambila?” Nzambi ànùbènèshè, myaba yònsò. Mukalenge ànùbènèshè. Byanza byànyi mbyèbi pààbi, byeela muulu.

234 Mukalenge, ngangàtèku. Mukalenge Nzambi, kundekediku ntèeka meeji àanyi, bu Yudàasa, pa ndola mukwàbo, pa mùshindù kampànda wa pa buloba, anyi muntu kampànda bwà kukutuuta cyanza paanyimà to, wamba ne: “Kaa, Mwanètù Branham, eci cidi. . .” To, to. Nzambi, aci kacingenzekediku to. Nèndondè ànu njila pàmwè ne banyààbanya badyombola bàà Mukalenge. Nèngiikalè mwanààbù ne muntu, kwenza cyònsò cìndi pàanyi mwà kwenza aci, Mukalenge, nnangà bantu ne mwoyi wànyi wònsò. Kadi, Mukalenge, kundekediku nguumuka ku Dîyi edi to. Ndi muswe kujúuka ku ditùkù dyà ndekeelu. Nènku ànu aba bàdi mu Dinwàngana dinène dyà mùjiki edi, Mukalenge, bu mungàteeci bwà kucyumvwija mu mapingaja emu, bóbò abu ke bààlwà kundekelu kwà—kwà dibeji dyà musambu, piikala dibiika dinène dyà ku lufù, ne Banjèlo bònsò

batuuta bikashi ne bansantu benda babwela. Mbôbò abu bàdi benze citùpà cyà dinaya adi mu dinaya dinène ditùdì twenza edi, ndi nsambila, Mukalenge.

²³⁵ Tudi bamanye ne mu dinaya kampànda bàtu bàshintulula bibwikilu, bàdi buumuka ku cintu kampànda bàya ku cikwàbo, nènku ki ciWàkenza aci. Udi mufumine ku Nyumà, Nzambì, Yèhowàh Munènè, kàdi kuvwala cibwikilu cyà kwìsù kwà muntu, kushintulula Webè—Webè—Webè ngiikadilu; Wèwè kushintulula. Wèwè kutentemuna Webè ntentà. Wèwè wàkapweka kuumuka ku Nzambì, ne kulwa muntu, bwà Wámòna mwà kufwà bwà kupikula muntu. Wàkashintulula cibwikilu Cyèbè cyà kwìsù.

²³⁶ Pashìshe kàbidì Udi mucìshintulule, ne Udi muDìbwikile mu bantu bàdi baswè kwitabuuja ne kwenza maalu bilondeshile Dìyì dyùdì Wèwè mufunde kaaba aka. Mèsù àdì àDimòna mmabènèshìibwe, myoyi yidì yiDyàkidila mmibènèshìibwè, maci àdì àDitèèleja mmabènèshìibwè, bwalu nekwenzeke dibìika dyà ku lufù pìikalà Dinwàngana dyà mijiki dijikè. Nzambì, enzaku bwà twètù bònsò twikalemu, Ùdikù mwa kuswa nàнку anyi? Bèneshaku kasùmbù kakesè aka.

²³⁷ Mu dyakula mùshindù ewu, Taatù, tudi bamanye ne mukàbà wà mèyì ewu ùyaaya pa buloba bujima. Kàdi ki kasùmbù kakesè kalenga aka, kasòmbe mwab'ewu leelù ewu, batèèleji bàdi bamweka ne mèsù apa mu Phoenix emu aba. Èyi Nzambì wa yààyà, bidimu dikumi ne bitaanu byà diyiisha dyà dishile ne dyà ditandishangana, kàdi, Nzambì, Wèwè ngudi mumanye kabingila, dinanga! Dinanga ditù—ditu dinyooka. Dinanga ditù—ditu ditandisha. Dinanga ditù dikazamuna.

²³⁸ Èyi Nzambì wa yààyà, swaku bwà ndisangeku pàmwè ne cisàmbà eci lumingu elu, ne swaku Utukazamuneku, Mukalenge, ne Dìyì Dyèbè. Swaku bwà twamònaku bukolè Bwèbè bujuulà babèèdì ne beena ntàtu, mèsù à bampofo akangudiibwa, Nyumà Mwimpè munène awu ulwa mumweneshìibwe mu cibambalu emu. Swaku bwà mwambi yònsò ne èkèleeziyà yònsò alakuke kapyà. Swaku bwà mpungilu wa beena kantu-ku-byanza ulwàlwa awu, Mukalenge, atèekèku mwoyi wa mwena kantu-ku-byanza yònsò, mu cimenga eci, mu kapyà bwà Nzambì. Enzaku nàнку, Mukalenge. Katwèna bamanye cyà dyanza pa bwalu abu to, cidì citambe ànu kulomba ne kwitabuuja ne necyenzeke. Tudi tudilambula twètù biine Kùdì, mu Yesù Kilistò, Mukalenge wetù.

Nènku mpindyewu tujuukilààyì kuulu.

²³⁹ Ndi mupèle mu dyakula, ncyena nshindumuna myàku yànyì bìmpè nànsha, kadi ndi muswe kwamba eci bwalu ndi mudyumvwe mucincimikiibwe bwà kucyènza. Mbanganyi mwab'ewu bàdi mwà kwela cyanza muulu, bwà ne nudi buumvwe cìndì njinga kwamba pa “Dinwàngana dyà mijiki dyà

Nzambi”? Ela cyanza cyèbè muulu. Twasàkidila. Mbîmpè. Udi uciitabuuja anyi?

²⁴⁰ Dîbà adi, n’Dinwàngana dyà mijiki, nwamònu’s. Neùsangànè ne Dìdi dilwa pa ndungilu, muntu yònsò ùdi ùdyèla nkonko. Mémè ndi ncibiikila ne ndungilu. Ncyèna mumanye mijiki to; mwimbi wa mijiki muneemu emu, mòna’s, yéyè’s mmufwànyine—yéyè mmufwànyine kumfwila luse bwà mùshindù wànyì wa mukàyàbale ewu. Kàdi, cidi, bàdi batuuata, bikèngela biikale ne cyà dyenza. Bidi mwa kupweka menemene, byenda ànu bipweka, nwènù kudikonka ne ncinyi Eci; kàdi, nwamònu’s, nwènù babwele mu cyoona cyàCi, nudi nuCyùmva. Ki mùshindù wùmèpelè wuwikalàku mwà kuumva Nzambi, ngwà kubwela mu cyoona cyà Cyòci aci.

²⁴¹ “Ncinyi ciine Aci? Mmunyi mûngààcyènzà? Mwanèètù Branham, mémè ndi ànu Méthodiste wa cyà bushùwà ewu, Baptiste, anyi mwena Mpenta.” Aci kî ncyoona aci to.

²⁴² Cyoona n’Nzambi. Nzambi ùdi Dîyì. Dîyì didi Nzambi. Cyoona cyà Nzambi, cidi ne, kutùmikila Dîyì Dyèndè. Dîbà adi paùdi utùmikila Dîyì, Yéyè ùdi útùuta cyoona ùnu bwèbè wèwè, pashìshe udi wangata kaaba kèèbè. Dîbà dyònsò didiDi dipweka, dipweka, dipweka, dìbanda, cyònsò cidiDi aci, udi mumanye ndungilu ayi.

Misangu mikwabo udi wamba ne: “Kaa, màsaamà à myoyi ne mateeta!”

²⁴³ Nzambi kàakambaku ne: “Maalu ónsò adi akwata mudimu pàmwè bwà dyàkalenga dyà bàdi baMunange, pândi Mémè ntuuta Dinwàngana Dyànyì dyà mijiki apa anyi”? Nènku udi usangana dîbà adi ne udi mutàcishùbwe ne mwela pànshi, ne mukengeshùbwe, bakwelulwila. Vùlukàayi ne, ki citùpà cidi ciyà mu nànkù aci. Byòbi kabìyi nànkù awu to, dîbà adi Dinwàngana dyà mijiki adi didi pambelu pàà bulondyanganyi bwà cyona.

²⁴⁴ Musàki munènè wa musambu mmumanye menemene ànu cidi mu cyòci aci. Yéyè mmumanye. Yéyè ùvwa mukumanye, kacya ku cibangidilu. Wàkafùnda dîna dyèbè mu Mukàndà wa Mwoyi wa Mwànà wa mùkòkò, kumpàla kwà difuka dyà dyulu ne buloba. Udi witabuuja aci anyi? Yéyè mmumanye cyùdi ne cyà kwenza. Nànsha cyòci cipwekà bishi, ne nànsha ciikàle cimweka cifiike bishi, cidi ne cyà kwikala mùshindù awu.

²⁴⁵ Kàdi, vùlukàayi ne, cyòci cibwela buludi mu mindidimbi ya lufù: “Mémè ndi dibiiikà dyà ku lufù ne Mwoyi; Nèmmujuulè cyàkàbidi.” Nènku pàdi Muludiki munène utuuluka ne utèeka dikombo adi pànshi, dîbà adi: “kawkàkwikala kàbidi cikondo to.” Pàdi Mwanjèlo awu, wa mu Bwàkabuulwìbwà nshapità wa 10, utèeka dikàsà dimwè pa buloba bume ne dikwàbo pa mbù, ne mwanzankongolo kumutù Kwèndè, Wàkadicìpa ne: “kawkàkwikala kàbidi cikondo to.” Pàalwà cikondo aci,

nenùjuukè munkaci mwà bafwè. Apu mpiikala bakwàbo abu bashààlemu, nwènù nenùbwele.

246 Shààlaayi mu Dinwàngana dyà mìjiki. Shààlaayi mu Dìyì dyà Nzambi. Nànsha byòbì biikàle bikolè bishi, shàala ànu naaDi, mwaba wònsò ùdi Nzambi utuuta awu.

247 Misangu mikwàbo Yèyè ùtu ujuula ndululu bwà kukosa myonji, bwà kukushiya mudishikamine. Ùtu wenza nàнку. Wèwè udi wamba ne: “Èè, ncyèna mumanye cìndì mufwanyine kwenza to.” Yèyè mmumanye. Dishìilangana kaayi? Udi wèwè ànu—udi wèwè ànu unaya citùpà cyanààna. Yèyè ki Udi mukukwàte mu cyanza Cyèndè. Yèyè ngudi ukuludika.

248 Vùlukààyì ne, byònsò mbyenza ku cimanyinu. Tudi tumòna cikondo citùdi ne mwoyi, ku cimanyinu citùdi tusanganyiiwbamù, pa nàнку tudi bamanye cìdi Dinwàngana dyà mìjiki dyenza leelu ewu. Ncikondo cyà kutapulula, kuumusha Bukènkè ku mîdimà.

249 Tùcyàmbàayi bònsò cyàpàmwè, bwà kanùlù kucipwaku mwoyi to, bwalu ndi ndyumvwa mwà kwamba nènku: “Ndyumusha dyà Bukènkè ku mîdimà.” Tùcyàmbàayi cyàkàbidi ne: “Ndyumusha dyà Bukènkè ku mîdimà.”

250 Ki Dinwàngana dyà mìjiki dyà Nzambi adi’s. Ùdi ùcileeja mu maulu. Ùdi ùcileeja pa cibàsa cifîike. Ùdi ùcileejila ku Yèyè mwine. Wákacilaya mu Dìyì. Tudi tucimòna cishindikiiabwe. Ùdi ùtâpulula blé ne bisota. Ùdi ùmusha Bukènkè ku mîdimà.

251 Nudi baMwitàbùùje, ne mwoyi wènù wònsò anyi? Nàнку, twìmbààyaakù musambu wètù mwîmpè awu.

252 Nènku ndi muswè kwambila bampaasàtà dîyì, bwà katancì kakesè cyanààna. Bâna bèètù, Mukalenge ànùbènèshè. Twasàkidilaayi bwà ditangalaja dyà masangisha ènù ne dilwa naawu kaaba aka. Kunùdi nwènù bampaasàtà bàdi aku abu, ncyà bushùwà ne ndi nnwela twasàkidila. Ndi mwaba ewu ànu . . .


253 Lekelaayi ngàmbè, bâna bèètù ne, nkufwànyineku kwikala ba-Méthodistes, ba-Baptistes, ba-Presbytériens. Nudi nuumvwa ne, ndi ngaakula ne beena Mpenta ànu byà mwomumwe ne muumvwa mwakule neenù anyi? Ànu mùshindù ùmwèùmwe awu, nwamònu’s. Kabyena . . .

254 Mémè nciyi mwà kubenga kupetangana ne muntu pa bidiye wàmba, ànu byètù byà menemene ebi, kadi mutungunuke ànu ne kumunanga . . . Bwalu, mémè mupangilàngane nendè ku mèyì, ànu bwà kupangilangana nendè ku mèyì patupu, ndi mwena lubombo; ncyèna mwakanyine bwà kwimana mwab’ewu to. Kadi mémè mupangilangane nendè ku mèyì bwà bwobùmwe ne dinanga ne dyumvwa, cidiye wenza nànsha ciikàle cinyi, yèyè udi ànu mwanèètù wa balùme wa musinga mukolè. Ndi ntwà ku cyèndè. Èyowà, bushùwà menemene. Ncyà bushùwà menemene.

Piikala aci kaciyi munda mwà mwoyi wànyì to, díbà adi Nzambi ànguumushe ku cyambilu eku, ncyèna mukumbanyine kwikala mwaba ewu to. Ncyà bushùwà. Ndi ncyàmba bwà dinanga, ne cintu kampànda cìndì mmòna cilwa. Ne Yèyè katukù mwanji kundekela bwà ngiikale mutupakane pa bwalu abu to, too ne leelù ewu, bwalu citu ànu Díyi Dyèndè misangu yònsò. Pa nàнку, Nzambi ànùbènèshè.

²⁵⁵ Mpindyewu twinyikààyaaku mitù yètù ànu bwà katanci kakesè cyanààna, bwà kwimba musambu mwîmpè, wa kale ewu utùtù twimba pa ciibidilu ewu, “Ndi muMunange, ndi muMunange.” Mwimbi wa pyàndò, anyi ní nganyi udiku awu, anyi beena mîjiki abu, bôbò mwà kutupèèshaku ndambu wa cyona cyàwù, ngeela meeji. Èyowà, èyo, twänjì tumonaayibi ní tudi mwà kuwimba díbà adi kakùyì mùjiki to. Bònsò cyàpàmwè mpindyewu, ne mitù yètù miinyika.

Ndi muMunange, ndi muMunange
Bwalu Yèyè wakannanga kumpàlà
Ne wakampetela lupàndu
Pa mucì wà Kàlvaryò.

²⁵⁶ Ngeela meeji ne mbiimànyike mikàbà yà mèyì mpindyewu. Nwamònu's, mukàbà wà mèyì ewu wùdi wùya kwònsò . . . 

64-0119 Shàlom
Ramada Inn
Phoenix, Arizona États-Unis

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org